

# জিঞ্জীর

কাজী নজরুল ইসলাম

BANGLADARSHAN.COM

# চিরঞ্জীব জগলুল

প্রাচীর দুয়ারে শুনি কলরোল সহসা তিমির-রাতে  
মেসেরের শের, শির, শমশের—সব গেল এক সাথে।  
সিন্ধুর গলা জড়িয়ে কাঁদিতে—দু-তীরে ললাট হানি  
ছুটিয়া চলেছে মরু-বকৌলি ‘নীল’ দরিয়ার পানি!  
আঁচলের তার ঝিনুক মাণিক কাদায় ছিটায় পড়ে,  
সোঁতের শ্যাওলা এলোকুন্তল লুটাইছে বালুচরে!...  
মরু-‘সাইমুম’—তাঞ্জামে চড়ি কোন পরীবানু আসে?  
‘লু’ হাওয়া ধরেছে বালুর পর্দা সম্রমে দুই পাশে!  
সূর্য নিজেই লুকায় টানিয়া বালুর আস্তরণ,  
ব্যজনী দুলায় ছিন্ন পাইন-শাখার প্রভঞ্জন।  
ঘূর্ণি-বাঁদীরা ‘নীল’ দরিয়ায় আঁচল ভিজায়ে আনি  
ছিটাইছে বারি, মেঘ হ’তে মাগি’ আনিছে বরফ পানি।  
ও বুঝি মিসর-বিজয়লক্ষ্মী মুরছিতা তাঞ্জামে,  
ওঠে হাহাকার ভগ্ন-মিনার আঁধার দীওয়ান-ই-আমে!  
কৃষ্ণাণের গরু মাঠে মাঠে ফেরে, ধরে নাকো আজ হাল,  
গম খেত ভেঙে পানি ব’য়ে যায় তবু নাহি বাঁধে আ’ল।  
মনের বাঁধেরে ভেঙেছে যাহারা চোখের সাঁতার পানি  
মাঠের পানি ও আ’লেরে কেমনে বাঁধিবে সে, নাহি জানি!  
হৃদয়ে যখন ঘনায় শাঙন, চোখে নামে বরসাত,  
তখন সহসা হয় গো মাথায় এমনই বজ্রপাত!...  
মাটিরে জড়িয়ে উপুড় হইয়া কাঁদিয়ে শ্রমিক কুলি,  
বলে,—“মা গো, তোর উদরে মাটির মানুষই হয়েছে ধূলি,  
রতন মাণিক হয় না তো মাটি, হীরা সে হীরাই থাকে,  
মোদের মাথায় কোহিনূর মণি—কী করিব বল তাকে?  
দুর্দিনে মা গো যদি ও-মাটির দুয়ার খুলিয়া খুঁজি,  
চুরি করিবি না তুই এ মাণিক? ফিরে পাব হারা পুঁজি?  
লৌহ পরশি’ করিনু শপথ, ফিরে নাহি পাই যদি  
নতুন করিয়া তোর বুকো মোরা বহাব রক্ত-নদী!”

আভীর-বালারা দুখাল গাভীরে দোহায় না, কাঁদে শুয়ে,  
দুমা-শিশুরা দূরে চেয়ে আছে দুধ ঘাস নাহি ছুঁয়ে।  
মিষ্টি ধারালো মিছুরির ছুরি মিসরী মেয়ের হাসি,  
হাঁসা পাথরের কুচি-সম দাঁত,—সব যেন আজ বাসি!  
আঙুর-লতার অলকগুচ্ছ—ডাঁশা আঙুরের থোপা,  
যেন তরুণীর আঙুলের ডগা—ছুরি বালিকার খোঁপা,  
ঝুরে ঝুরে পড়ে হতাদরে আজ অশ্রুর বঁদ সম!  
কাঁদিতেছে পরী, চারিদিকে অরি, কোথায় অরিন্দম!  
মরু-নটী তার সোনার ঘুঙুর ছুঁড়িয়া ফেলেছে কাঁদি,  
হলুদ খেজুর-কাঁদিতে বুঝি বা রয়েছে তাহারা বাধি।’  
নতুন করিয়া মরিল গো বুঝি আজি মিসরের মমি,  
শ্রদ্ধায় আজি পিরামিড যায় মাটির কবরে নমি!’  
মিসরে খেদিব ছিল বা ছিল না, ভুলেছিল সব লোক,  
জগলুলে পেয়ে ভুলেছিল ওরা সুদান-হারার শোক।  
জানি না কখন ঘনাবে ধরার ললাটে মহাপ্রলয়,  
মিসরের তরে ‘রোজ-কিয়ামত’ ইহার অধিক নয়।  
রহিল মিসর, চ’লে গেল তার দুর্মদ যৌবন,  
রুস্তম গেল, নিস্প্রভ কায়খসরু-সিংহাসন।  
কী শাপে মিসর লভিল অকালে জরা যযাতির প্রায়,  
জানি না তাহার কোন্ সূত দেবে যৌবন ফিরে তায়।  
মিসরের চোখে বাতিল নতুন সুয়েজ খালের বান,  
সুদান গিয়াছে—গেল আজ তার বিধাতার মহাদান!  
‘ফেরাউন’ডুবে না মরিয়া হয় বিদায় লইল মুসা,  
প্রাচীর রাত্রি কাটিবে না কি গো, উদিবে না রাঙা উষা?  
শুনিয়াছি, ছিল মমির মিসরে সম্রাট ফেরাউন<sup>৩</sup>,  
জননীর কোলে সদ্যপ্রসূত বাচ্চার নিত খুন!  
শুনেছিল বাণী, তাহারই রাজ্যে তারই রাজপথ দিয়া  
অনাগত শিশু, আসিছে তাহার মৃত্যু-বারতা নিয়া।  
জীবন ভরিয়া করিল যে শিশু-জীবনের অপমান  
পরের মৃত্যু-আড়ালে দাঁড়ায়ে সে-ই ভাবে, পেল প্রাণ।  
জনমিল মুসা, রাজভয়ে মাতা শিশুরে ভাসায় জলে,

BANGLADARSHAN.COM

ভাসিয়া ভাসিয়া সোনার শিশু গো রাজারই ঘাটেতে চলে।  
ভেসে এলো শিশু রাণীরই কোলে গো, বাড়ে শিশু দিনে দিনে,  
শত্রু তাহারই বুকে চড়ে নাচে, ফেরাউন নাহি চিনে।  
এল অনাগত তারই প্রাসাদের সদর দরজা দিয়া,  
তখনও প্রহরী জাগে বিনিদ্র দশ দিক আগুলিয়া!

–রসিক খোদার খেলা,

তারই বেদনায় প্রকাশে রুদ্র যারে করে অবহেলা।...

মুসারে আমরা দেখিনি, তোমায় দেখেছি মিসর-মুনি,  
ফেরাউন মোরা দেখিনি, দেখেছি নিপীড়ন ফেরাউনী।  
ছোট্টে অনন্ত সেনা-সামন্ত অনাগত কার ভয়ে,  
দিকে দিকে খাড়া কারা-শৃঙ্খল, জল্লাদ ফাঁসি লয়ে।  
আইন-খাতায় পাতায় পাতায় মৃত্যুদণ্ড লেখা,  
নিজের মৃত্যু এড়াতে কেবলই নিজেরে করিছে একা!  
সদ্যপ্রসূত প্রতি শিশুটিরে পিয়ায় অহর্নিশ

শিক্ষা দীক্ষা সভ্যতা বলি তিলে-তিলে-মারা বিষ।  
ইহারা কলির নব ফেরাউন ভেলকি খেলায় হাড়ে,  
মানুষ ইহারা না মেরে প্রথমে মনুষ্যত্ব মারে।

মনুষ্যত্বহীন এই সব মানুষেরই মাঝে কবে  
হে অতি-মানুষ, তুমি এসেছিলে জীবনের উৎসবে।  
চারিদিকে জাগে মৃত্যুদণ্ড রাজকারা প্রতিহরী,  
এরই মাঝে এলে দিনের আলোক নির্ভীক পথচারী।  
রাজার প্রাচীর ছিল দাঁড়াইয়া তোদের আড়াল করি,  
আপনি আসিয়া দাঁড়াইলে তার সকল শূন্য ভরি!  
পয়গম্বর মুসার তবু তো ছিল ‘আযা’ অদ্ভুত,  
খোদ সে খোদার প্রেরিত–ডাকিলে আসিত স্বর্গ-দূত।  
পয়গম্বর ছিলে নাকো তুমি–পাওনি ঐশী বাণী,  
স্বর্গের দূত ছিল না দোসর, ছিলে না শস্ত্র-পাণি,  
আদেশে তোমার নীল দরিয়ার বক্ষে জাগেনি পথ,  
তোমারে দেখিয়া করেনি সালাম কোনো গিরি-পর্বত।  
তবুও এশিয়া আফ্রিকা গাহে তোমার মহিমা-গান,  
মনুষ্যত্ব থাকিলে মানুষ সর্বশক্তিমান!

দেখাইলে তুমি, পরাধীন জাতি হয় যদি ভয়হারা,  
হোক নিরস্ত্র,—অস্ত্রের রণে বিজয়ী হইবে তারা।  
অসি দিয়া নয়, নির্ভীক করে মন দিয়া রণ জয়,  
অস্ত্রে যুদ্ধ জয় করা সাজে—দেশজয় নাহি হয়।  
ভয়ের সাগর পাড়ি দিল যেই শীর করিল না নীচু,  
পশুর নখর দন্ত দেখিয়া হটিল না কভু পিছু,  
মিথ্যাচারীর ক্রকুটি-শাসন নিষেধ রক্ত-আঁখি  
না মানি—জাতির দক্ষিণ করের বাঁধিল অভয় রাখী,  
বন্ধন যারে বন্দিল হ'য়ে নন্দন-ফুলহার,  
না-ই হল সে গো পয়গম্বর নবী দেব অবতার,  
সর্ব কালের সর্ব দেশের সকল নর ও নারী  
করে প্রতীক্ষা, গাহে বন্দনা, মাগিছে আশীষ্ তারই!

‘এই ভারতের মহামানবের সাগর-তীরে’ হে ঋষি,  
তেত্রিশ কোটি বলির ছাগল চরিতেছে দিবানিশি!  
গোষ্ঠে গোষ্ঠে আত্মকলহ অজায়ুদ্ধের মেলা,  
এদের রুধিরে নিত্য রাঙিছে ভারত-সাগর-বেলা।  
পশুরাজ যবে ঘাড় ভেঙে খায় একটারে ধরে আসি’  
আরটা তখনও দিব্যি মোটায়ে হতেছে খোদার খাসি!  
শুনে হাসি পায়, ইহাদেরও নাকি আছে গো ধর্ম জাতি,  
রাম-ছাগল আর ব্রহ্ম-ছাগল আরেক ছাগল পাতি!  
মৃত্যু যখন ঘনায় এদের কসা’য়ের কল্যাণে,  
তখনও ইহারা লাঙুল উঁচায়ে এ উহারে গালি হানে!

ইহাদের শিশু শৃগালে মারিলে এরা সভা করে কাঁদে,  
অমৃতের বাণী শুনাতে এদের লজ্জায় নাহি বাধে!  
নিজেদের নাই মনুষ্যত্ব, জানি না কেমনে তা’রা  
নারীদের কাছে চাহে সতীত্ব, হয় রে সরম-হারা!  
কবে আমাদের কোন্ সে পুরুষে ঘৃত খেয়েছিল কেহ,  
আমাদের হাতে তারই বাস পাই, আজও করি অবলেহ!

আশা ছিল, তবু তোমাদেরই মতো অতি মানুষেরে-দেখি  
আমরা ভুলিব মোদের এ গ্লানি, খাঁটি হবে যত মেকি।

তাই মিসরের নহে এই শোক এই দুর্দিন আজি,  
এশিয়া আফ্রিকা দুই মহাভূমি বেদনা উঠেছে বাজি!  
অধীন ভারত তোমারে স্মরণ করিয়াছে শতবার,  
তব হাতে ছিল জলদস্যুর ভারত-প্রবেশ-দ্বার!  
হে 'বনি ইসরাইলে'র দেশের অগ্রনায়ক বীর,  
অঞ্জলি দিনু 'নীলে'র সলিলে অশ্রু ভাগীরথীর।  
সালাম করারও স্বাধীনতা নাই সোজা দুই হাত তুলি  
তব 'ফাতেহা'য় কী দিবে এ জাতি বিনা দুটো বাঁধা বুলি?  
মলয়-শীতলা সুজলা এ দেশে-আশীষ করিও খালি-  
উড়ে আসে যেন তোমার দেশের মরুর দু-মুঠো বালি।

তোমার বিদায়ের দূর অতীতের কথা সেই মনে পড়ে,  
মিসর হইতে বিদায় লইল মুসা যবে চিরতরে,  
সম্ভ্রমে সরে পথ করে দিল 'নীল' দরিয়ার বারি,  
পিছু পিছু চলে কাঁদিয়া কাঁদিয়া মিসরের নরনারী,  
শ্যেন-সম ছোটো ফেরাউন-সেনা বাঁপ দিয়া পড়ে স্রোতে,  
মুসা হল পার, ফেরাউন ফিরিল না 'নীল' নদী হতে।  
তোমার বিদায়ে করিব না শোক, হয়তো দেখিবে কাল  
তোমার পিছনে মরিছে ডুবিয়া, ফেরাউন দজ্জাল!

# অগ্র-পথিক

অগ্র-পথিক হে সেনাদল,  
জোর কদম চল রে চল।

রৌদ্রদধি মাটিমাখা শোন ভাইরা মোর,  
বসি বসুধায় নব অভিযান আজিকে তোর!  
রাখ্ তৈয়ার হাতেলিতে হাথিয়ার জোয়ান,  
হান রে নিশিত পাশুপতাস্ত্র অগ্নিবাণ!

কোথায় হাতুড়ি কোথা শাবল?  
অগ্র-পথিক রে সেনাদল,  
জোর্ কদম্ চল্ রে চল্॥

কোথায় মাণিক ভাইরা আমার, সাজ্ রে সাজ্!  
আর বিলম্ব সাজে না, চালাও কুচ্কাওয়াজ!

আমরা নবীন তেজ-প্রদীপ্ত বীর তরুণ  
বিপদ বাধার কণ্ঠ ছিঁড়িয়া শুষ্ক খুন!

আমরা ফলাব ফুল-ফসল।  
অগ্র-পথিক রে যুবাদল,  
জোর্ কদম্ চল্ রে চল্॥

প্রাণ-চঞ্চল প্রাচী'র তরুণ, কর্মবীর,  
হে মানবতার প্রতীক গর্ব উচ্চশির!  
দিব্যচক্ষে দেখিতেছি, তোরা দৃশুপদ  
সকলের আগে চলিবি পারায়ে গিরি ও নদ,

মরু-সঞ্চর গতি-চপল।  
অগ্র-পথিক রে পাঁওদল,  
জোর্ কদম্ চল্ রে চল্॥

স্থবির শান্ত প্রাচী'র প্রাচীন জাতিরা সব  
হারায়েছে আজ দীক্ষাদানের সে-গৌরব।  
অবনত-শির গতিহীন তারা-মোরা তরুণ  
বহিব সে ভার, লব শাস্ত্র ব্রত দারুণ

শিখাব নতুন মন্ত্রবল।  
রে নব পথিক যাত্রীদল,  
জোর্ কদম্ চল্ রে চল্॥

আমরা চলিব পশ্চাতে ফেলি' পচা অতীত,  
গিরি-গুহা ছাড়ি' খোলা প্রান্তরে গাহিব গীত।  
সৃজিব জগৎ বিচিত্রতর, বীর্যবান,  
চলমান-বেগে প্রাণ-উছল।  
রে নবযুগের স্রষ্টাদল,  
জোর্ কদম্ চল্ রে চল্॥

অভিযান-সেনা আমরা ছুটিব দলে দলে  
বনে নদীতটে গিরি-সংকটে জলে থলে।  
লঙ্ঘিব খাড়া পর্বত-চূড়া অনিমিষে,  
জয় করি সব তস্নস্ করি পায়ে পিষে,

অসীম সাহসে ভাঙি আগল!  
না জানা পথের নকীব-দল,  
জোর্ কদম্ চল্ রে চল্॥

পাতিত করিয়া শুরু বৃদ্ধ অটবীরে  
বাঁধ বাঁধি চলি দুস্তর খর স্রোত-নীরে।  
রসাতল চিরি' হীরকের খনি করি খনন,  
কুমারী ধরার গর্ভে করি গো ফুল সৃজন,  
পায়ে হেঁটে মাপি ধরণীতল!  
অগ্র-পথিক রে চঞ্চল,  
জোর্ কদম্ চল্ রে চল্॥

আমরা এসেছি নবীন প্রাচী'র নবস্রোতে  
ভীম পর্বত ক্রকচ-গিরির' চূড়া হ'তে,  
উচ্চ অধিত্যকা প্রণালিকা হইয়া বার;  
আহত বাঘের পদ-চিন্ ধরি' হয়েছি বার;  
পাতাল ফুঁড়িয়া, পথ-পাগল।  
অগ্রবাহিনী পথিক-দল,  
জোর্ কদম্ চল্ রে চল্॥

BANGLADARSHAN.COM

আয়র্ল্যান্ড, আরব, মিসর, কোরিয়া চীন,  
নরওয়ে, স্পেন, রাশিয়া,—সবার ধারি গো ঋণ!  
সবার রক্তে মোদের লোহর আভাস পাই,  
এক বেদনার 'কমরেড' ভাই মোরা সবাই।

সকল দেশের মোরা সকল।  
রে চির-যাত্রী পথিক-দল,  
জোর্ কদম্ চল্ রে চল্॥

বলগা-বিহীন শৃঙ্খল-ছেঁড়া প্রিয় তরণ!  
তোদের দেখিয়া টগবগ করে বক্ষে খুন।  
কাঁদি বেদনায়, তবু রে তোদের ভালোবাসায়  
উল্লাসে নাচি আপনা-বিভোল, নব আশায়।

ভাগ্য-দেবীর লীলা-কমল,  
অগ্রপথিক রে সেনাদল!  
জোর্ কদম্ চল্ রে চল্॥

তরণ তাপস! নব শক্তিরে জাগায়ে তোল্।  
করণায় নয়—ভয়ংকরীর দুয়ার খোল্।  
নাগিনি-দশনা রণরঙ্গিনী শস্ত্রকর  
তোর দেশ-মাতা, তাহারই পতাকা তুলিয়া ধর।

রক্ত-পিয়াসী অচঞ্চল  
নির্মম-ব্রত রে সেনাদল!  
জোর্ কদম্ চল্ রে চল্॥

অভয়-চিত্ত ভাবনা-মুক্ত যুবারা, শুন!  
মোদের পিছনে চিৎকার করে পশু, শকুন!  
ক্রকুটি হানিছে পুরাতন পচা গলিত শব,  
রক্ষণশীল বুড়োরা করিছে তা'রই স্তব

শিবারা চৈঁচাক, শিব অটল!  
নির্ভীক বীর পথিক-দল,  
জোর্ কদম্ চল্ রে চল্॥

আগে-আরও আগে সেনা-মুখ যথা করিছে রণ,  
পলকে হতেছে পূর্ণ মৃতের শূন্যাসন,  
আছে ঠাই আছে, কে থামে পিছনে? হ আশুয়ান!  
যুদ্ধের মাঝে পরাজয় মাঝে চলো জোয়ান!

জ্বাল্ রে মশাল জ্বাল্ অনল!  
অগ্রযাত্রী রে সেনাদল,  
জোর্ কদম্ চল্ রে চল্॥

নতুন করিয়া ক্লান্ত ধরার মৃত শিরায়  
স্পন্দন জাগে আমাদের তরে, নব আশায়।  
আমাদেরই তা'রা-চলিছে যাহারা দৃঢ় চরণ  
সম্মুখ পানে, একাকী অথবা শতেক জন।

মোরা সহস্র-বাহু-সবল।  
রে চির-রাতের সান্ত্বিদল,  
জোর্ কদম্ চল্ রে চল্॥

জগতের এই বিচিত্রতম মিছিলে ভাই  
কত রূপ কত দৃশ্যের লীলা চলে সদাই!-  
শ্রমরত ওই কালি-মাখা কুলি, নৌ-সারং,  
বলদের মাঝে হলধর চাষা দুখের সং,

প্রভু স-ভৃত্য পেষণ-কল,-  
অগ্র-পথিক উদাসী-দল,  
জোর্ কদম্ চল্ রে চল্॥

নিখিল গোপন ব্যর্থ-প্রেমিক আর্ত-প্রাণ  
সকল কারার সকল বন্দী আহত-মান,  
ধরার সকল সুখী ও দুঃখী, সৎ, অসৎ,  
মৃত, জীবন্ত, পথ-হারা, যারা ভোলেনি পথ,-

আমাদের সাথী এরা সকল।  
অগ্র-পথিক রে সেনাদল,  
জোর্ কদম্ চল্ রে চল্॥

ছুঁড়িতেছে ভাঁটা জ্যোতির্চক্র ঘূর্ণ্যমান  
হেরো পুঞ্জিত গ্রহ-রবি-তারা দীপ্তপ্রাণ;

আলো-ঝলমল দিবস, নিশীথ স্বপ্নাতুর,—  
বন্ধুর মতো চেয়ে আছে সবে নিকট-দূর।  
এক ধ্রুব সবে পথ-উতল।  
নব যাত্রিক পথিক দল,  
জোর্ কদম্ চল্ রে চল্॥

আমাদের এরা, আছে এরা সবে মোদের সাথ,  
এরা সখা-সহযাত্রী মোদের দিবস-রাত।  
ক্রম-পথে আসে মোদের পথের ভাবী পথিক,  
এ মিছিলে মোরা অগ্র-যাত্রী সুনির্ভীক।  
সুগম করিয়া পথ পিছল  
অগ্র-পথিক রে সেনাদল,  
জোর্ কদম্ চল্ রে চল্॥

ওগো ও প্রাচীর দুলালী দুহিতা তরুণীরা,  
ওগো জায়া ওগো ভগিনীরা। ডাকে সঙ্গীরা।  
তোমরা নাই গো, লাঞ্ছিত মোরা তাই আজি,  
উঠুক তোমার মণি-মঞ্জীর ঘন বাজি'  
আমাদের পথে চল-চপল।  
অগ্র-পথিক তরুণ-দল  
জোর্ কদম্ চল্ রে চল্॥

ওগো অনাগত মরু-প্রান্তর বৈতালিক!  
শুনিতেছি তব আগমনী-গীতি দিগ্বিদিক।  
আমাদেরই মাঝে আসিতেছ তুমি দ্রুত পায়ে।—  
ভিন্-দেশী কবি! থামাও বাঁশরী বট-ছায়ে,  
তোমার সাধনা আজি সফল।  
অগ্র-পথিক চারণ-দল  
জোর্ কদম্ চল্ রে চল্॥

আমরা চাহি না তরল স্বপন, হালকা সুখ,  
আরাম-কুশন, মখমল-চটি, পান'সে থুক  
শান্তির বাণী, জ্ঞান-বানিয়ার বই-গুদাম,  
হেঁদো হুন্দের পল্কা, উর্গা, সস্তা নাম,

পচা দৌলত;-দুপায়ে দল!  
কঠোর দুখের তাপসদল,  
জোর কদম্ চল্ রে চল্॥

পান-আহার ভোজে মত্ত কি যত ঔদরিক?  
দুয়ার জানালা বন্ধ করিয়া ফেলিয়া চিক্  
আরাম করিয়া ভুঁড়োরা ঘুমায়?-বন্ধু, শোন,  
মোটা ডালরুটি, ছেঁড়া কম্বল, ভূমি-শয়ন,  
আছে তো মোদের পাথেয়-বল!  
ওরে বেদনার পূজারী দল,  
মোছ রে অশ্রু, চল্ রে চল্॥

নেমেছে কি রাত্তি? ফুরায় না পথ সুদুর্গম?  
কে থামিস্ পথে ভগ্নোৎসাহ নিরুদ্যম?  
ব'সে নে খানিক পথ-মঞ্জিলে, ভয় কী ভাই,  
থামিলে দুদিন ভোলে যদি লোকে-ভুলুক তাই!  
মোদের লক্ষ্য চির-অটল!  
অগ্র-পথিক ব্রতীর দল,  
বাঁধরে বুক, চল্ রে চল্॥

শুনিতেছি আমি, শোন ওই দূরে তূর্য-নাদ  
ঘোষিছে নবীন উষার উদয়-সুসংবাদ!  
ওরে তুরা কর! ছুটে চল্ আগে-আরও আগে!  
গান গেয়ে চলে অগ্র-বাহিনী, ছুটে চল্ তারও পুরোভাগে!  
তোর অধিকার কর্ দখল!  
অগ্র-নায়ক রে পাঁওদল!  
জোরর্ কদম্ চল্ রে চল্॥

# অহ্মাণের সওগাত

ঋতুর খাঞ্চণ ভরিয়া এল কি ধরণীর সওগাত?

নবীন ধানের আহ্মাণে আজি অহ্মাণ হল মাত।

‘গিন্ণি-পাগল’ চালের ফির্ণী

তশ্তরী ভরে নবীনা গিন্ণি

হাসিতে হাসিতে দিতেছে স্বামীরে, খুশীতে কাঁপিছে হাত।

শিরণী বাঁধেন বড় বিবি, বাড়ী গন্ধে তেলেস্মাত!

মিয়ার্ণা ও বিবিতে বড় ভাব আজি খামারে ধরে না ধান।

বিছানা করিতে ছোট বিবি রাতে চাপা সুরে গাহে গান!

‘শাশবিবি’ কন, “আহা, আসে নাই

কতদিন হল মেজলা জামাই।”

ছোট মেয়ে কয়, “আম্মা গো, রোজ কাঁদে মেজো বুবুজান!”

দলিজেৰ পান সাজিয়া সাজিয়া সেজো-বিবি লবেজান!

হল্লা করিয়া ফিরিছে পাড়ায় দসি় ছেলের দল।

ময়নামতীর শাড়ি-পরা মেয়ে গয়নাতে ঝলমল!

নতুন পৈঁচি-বাজুবন্দ পরে

চাষা-বউ কথা কয় না গুমোরে

জারিগন আর গাজীর গানেতে সারা গ্রাম চঞ্চল!

বউ করে পিঠা ‘পুর’-দেওয়া মিঠা, দেখে জিভে সরে জল!

মাঠের সাগরে জোয়ারের পরে লেগেছে ভাটীর টান।

রাখাল ছেলের বিদায়-বাঁশীতে ঝুরিছে আমন ধান!

কৃষক-কঠে ভাটিয়ালী সুর

রোয়ে রোয়ে মরে বিদায়-বিধুর!

ধান ভানে বউ, দুলে দুলে ওঠে রূপ-তরঙ্গে বান!

বধূর পায়ের পরশে পেয়েছে কাঠের টেকিও প্রাণ!

হেমন্ত-গায় হেলান দিয়ে গো রৌদ্র পোহায় শীত!

কিরণ-ধারায় ঝরিয়া পড়িছে সূর্য-আলো-সরিৎ!

দিগন্তে যেন তুর্কী কুমারী

কুয়াশা-নেকাব রেখেছে উতারি।

BANGLADARSHAN.COM

চাঁদের প্রদীপ জ্বলাইয়া নিশি জাগিছে একা নিশীথ!  
নতুনের পথ চেয়ে চেয়ে হল হরিত পাতারা পীত।  
নবীনের লাল ঝাড়া উড়ায়ে আসিতেছে কিশলয়,  
রক্ত-নিশান নহে যে রে ওরা রিক্ত শাখার জয়!  
‘মুজ্জদা’ এনেছে অগ্রহায়ণ—  
আসে নওরোজ খোলো গো তোরণ!  
গোলা ভ’রে রাখ সারা বছরের হাসি-ভরা সঞ্চয়।  
বাসি বিছানায় জাগিতেছে শিশু সুন্দর নির্ভয়!

কলিকাতা

১০ কার্তিক ১৩৩৩

BANGLADARSHAN.COM

# আয় বেহেশতে কে যাবি আয়

আয় বেহেশতে কে যাবি, আয়  
প্রাণের বুলন্দ দরওয়াজায়,  
‘তাজা-ব-তাজা’-র গাহিয়া গান  
চির-তরণের চির-মেলায়!  
আয় বেহেশতে কে যাবি আয় ॥

যুবা-যুবতীর সে দেশে ভিড়,  
সেথা যেতে নারে বুঢ়া পীর,  
শাস্ত্র-শকুন জ্ঞান-মজুর  
যেতে নারে সেই ছরী-পরীর  
শারাব সাকীর গুলিস্তায়।  
আয় বেহেশতে কে যাবি আয় ॥

সেথা হরদম খুশীর মৌজ,  
তীর হানে কালো-আঁখির ফৌজ,  
পায়ে পায়ে সেথা আর্জি পেশ,  
দিল চাহে সদা দিল-আফরোজ,  
পিরানে পরাণ বাঁধা সেথায়।  
আয় বেহেশতে কে যাবি আয় ॥

করিল না যারা জীবনে ভুল,  
দলিল না কাঁটা, ছেঁড়েনি ফুল,  
দারোয়ান হ’য়ে সারা জীবন  
আগুলিল বেড়া, ছুল না গুল,-  
যেতে নারে তারা এ-জলসায়।  
আয় বেহেশতে কে যাবি আয় ॥

বুড়ো নীতিবিদ-নুড়ির প্রায়  
পেল নাক’ এক বিন্দু রস  
চিরকাল জলে রহিয়া হয়!-  
কাঁটা বিঁধে যার ক্ষত আঙুল

দোলে ফুলমালা তারই গলায়।  
আয় বেহেশ্তে কে যাবি আয় ॥

তিলে তিলে যারা পিষে মারে  
অপরের সাথে আপনারে,  
ধরণীর ঙ্গদ-উৎসবে  
রোজা রেখে পড়ে থাকে দ্বারে,  
কাফের তাহারা এ-ঙ্গদগায়!-  
আয় বেহেশ্তে কে যাবি আয় ॥

বুলবুল গেয়ে ফেরে বলি'  
যাহারা শাসায়ে ফুলবনে  
ফুটিতে দিল না ফুলকলি;  
ফুটিলে কুসুম পায়ে দলি'  
মারিয়াছে, পাসে বাস বিলায়!

হারাম তা'রা এ-মুশায়েরায়!  
আয় বেহেশ্তে কে যাবি আয় ॥

হেথা কোলে নিয়ে দিলরুবা  
শারাবী গজল গাহে যুবা।  
প্রিয়ার বে-দাগ কপোলে গো  
ঐকে দেয় তিল্ মনোলোভা,  
প্রেমের-পাপীর এ-মোজরায়।  
আয় বেহেশ্তে কে যাবি আয় ॥

আসিতে পারে না হেথা বে-দীন  
মৃত প্রাণ-হীন জরা-মলিন  
নৌ-জোয়ানীর এ-মহফিল  
খুন ও শারাব হেথা অ-ভিন্,  
হেথা ধনু বাঁধা ফুলমালায়!  
আয় বেহেশ্তে কে যাবি আয় ॥

পেয়ালায় হেথা শহীদী খুন  
তলোয়ার-চৌয়া তাজা তরুণ  
আঙ্গুর-হৃদি চুয়ানো গো

গেলাসে শারাব রাঙা অরুণ।  
শহীদে প্রেমিকে ভিড় হেথায়।  
আয় বেহেশতে কে যাবি আয় ॥

প্রিয়া-মুখে হেথা দেখি গো চাঁদ,  
চাঁদে হেরি প্রিয়-মুখের ছাঁদ।  
সাধ ক'রে হেথা করি গো পাপ,  
সাধ ক'রে বাঁধি বালির বাঁধ  
এ রস-সাগরে বালু-বেলায়!  
আয় বেহেশতে কে যাবি আয় ॥

কলিকাতা  
১ পৌষ, ১৩৩৩

BANGLADARSHAN.COM

# ঈদ-মোবারক

শত যোজনের কত মরুভূমি পারায়ে গো,  
কত বালুচরে কত আঁখি-ধরা ঝরায়ে গো,  
বরষের পরে আসিলে ঈদ!

ভুখারীর দ্বারে সওগাত বয়ে রিজ্‌ওয়ানের,  
কণ্টক-বনে আশ্বাস এনে গুল্-বাগের,  
সাকীরে 'জামের' দিলে তাগিদ!

খুশীর পাপিয়া পিউ পিউ গাহে দিগ্বিদিক্,  
বধু জাগে আজ নিশীথ-বাসরে নির্গিমিখ!  
কোথা ফুলদানী, কাঁদিছে ফুল!

সুদূর প্রবাসে ঘুম নাহি আসে কার সখার,  
মনে পড়ে শুধু সোঁদা-সোঁদা বাস এলো খোঁপার,  
আকুল করবী উল্‌ঝলুলু!!

ওগো কা'ল সাঁঝে দ্বিতীয় চাঁদের ইশারা কোন  
মুজদা' এনেছে, সুখে ডগমগ মুকুলী মন!

আশাবরী-সুরে বুঝে সানাই।

আতর সুবাসে কাতর হ'ল গো পাথর-দিল',  
দিলে দিলে আজ বন্ধকি দেনা-নাই দলিল,  
কবুলিয়তের নাই বলাই॥

আজিকে এজিদে হাসেন হোসেন গলাগলি,  
দোজখে<sup>২</sup> ভেশ্তে<sup>৩</sup> ফুলে ও আগুনে ঢলাঢলি,  
শিরী ফরহাদে জড়াজড়ি।

সাপিনীর মতো বেঁধেছে লায়লি কায়েসে গো,  
বাহুর বন্ধে চোখ বুঁজে বঁধু আয়েসে গো!  
গালে গালে চুমু গড়াগড়ি॥

দাউ দাউ জ্বলে আজি স্ফূর্তির জাহান্নাম,  
শয়তান আজ ভেশ্তে বিলায় শারাব-জাম,  
দুশ্মত দোস্ত এক-জামাত!

BANGLADARSHIAN.COM

আজি আরফাত-ময়দান পাতা গাঁয়ে গাঁয়ে,  
কোলাকুলি করে বাদশা-ফকীরে ভায়ে ভায়ে,  
কাবা ধ'রে নাচে 'লাত-মানাত্॥'

আজি ইসলামী-ডঙ্কা গরজে ভরি' জাহান,  
নাই বড় ছোট-সকল মানুষ এক সমান,  
রাজা প্রজা নয় কারও কেহ।

কে আমার তুমি নওয়ার বাদশা বালাখানায়?  
সকল কালের কলঙ্ক তুমি; জাগালে হয়  
ইসলামে তুমি সন্দেহ॥

ইসলাম বলে, সকলের তরে মোরা সবাই,  
সুখ-দুখ সম-ভাগ করে নেব সকলে ভাই,  
নাই অধিকার সঞ্চয়ের!

কারও আঁখি-জলে কারও ঝাড়ে কি রে জুলিবে দীপ?  
দুজনার হবে বুলন্দ-নসিব<sup>১</sup>, লাখে লাখে হবে বদনসীব?  
এ নহে বিধান ইসলামের॥

ঈদ-অল্-ফিতর আনিয়াছে তাই নববিধান,  
ওগো সঞ্চয়ী, উদ্বৃত্ত যা করিবে দান,  
ক্ষুধার অন্ন হোক তোমার!

ভোগের পেয়ালা উপচায়ে পড়ে তব হাতে,  
তৃষ্ণাতুরের হিসসা আছে ও পেয়ালাতে,  
দিয়া ভোগ কর, বীর, দেদার॥

বুক খালি ক'রে আপনারে আজ দাও জাকাত,<sup>২</sup>  
ক'রো না হিসাবী, আজি হিসাবের অঙ্কপাত!  
একদিন কর ভুল হিসাব।

দিলে দিলে আজ খুনসুড়ি করে দিল্লগি,  
আজিকে ছায়েলা-লায়েলা-চুমায় লাল যোগী!  
জামশেদ বেঁচে চায় শারাব॥

পথে পথে আজ হাঁকিব বন্ধু, ঈদ-মোবারক! আস্সালাম!  
ঠোঁটে ঠোঁটে আজ বিলাব শিরণী ফুল-কালাম!

বিলিয়ে দেওয়ার আজিকে ঈদ!  
আমার দানের অনুরাগে-রাঙা ঈদগা রে!  
সকলের হাতে দিয়ে দিয়ে আজ আপনারে-  
দেহ নয়, দিল হবে শহীদ ॥

কলিকাতা

১৯ চৈত্র, ১৩৩৩

BANGLADARSHAN.COM

# উমর ফারুক

তিমির রাত্রি-‘এশা’র আজান শুনি দূর মসজিদে

প্রিয়া-হারা কান্নার মতো এ-বুকে আসিয়া বিঁধে!

আমির-উল-মুমেনিন,

তোমার স্মৃতি যে আজানের ধ্বনি-জানে না মুয়াজ্জিন!

তকবির শুনি শয্যা ছাড়িয়া চকিতে উঠিয়া বসি,

বাতায়নে চাই-উঠিয়াছে কি রে গগনে মরুর শশী?

ও-আজানে ও কি পাপিয়ার ডাক, ও কি চকোরীর গান?

মুয়াজ্জিনের কণ্ঠে ও কি ও তোমারই সে আহ্বান?

আবার লুটায় পড়ি!

‘সেদিন গিয়াছে’-শিয়রের কাছে কহিছে কালের ঘড়ি!

উমর! ফারুক! আখেরী নবীর ওগো দক্ষিণ-বাহু!

আহ্বান নয়-রূপ ধ’রে এস!-গ্রাসে অন্ধতা-রাহু

ইসলাম-রবি, জ্যোতি আজ তার দিনে দিনে বিমলিন!

সত্যের আলো নিভিয়া-জ্বলিছে জোনাকির আলো ক্ষীণ!

শুধু অঙ্গুলি-হেলনে শাসন করিতে এ জগতের

দিয়াছিলে ফেলি মুহম্মদের চরণে যে-শমশের,

ফিরদৌস ছাড়ি নেমে এস তুমি সেই শমশের ধরি,

আর একবার লোহিত-সাগরে লালে লাল হয়ে মরি!

নওশার বেশে সাজাও বন্ধু মোদের পুনর্বীর

খুনের সেহেরা পরাইয়া দাও হাতে বাঁধি’ হাতিয়ার!

দেখাইয়া দাও-মৃত্যু যথায় রাঙা দুলাহিন-সাজে

করে প্রতীক্ষা আমাদের তরে রাঙা রণ-ভূমি মাঝে!

মোদের ললাট-রক্তে রাঙিবে রিক্ত সিঁথি তাহার,

দুলাব তাহার গলায় মোদের লোহু-রাঙা তরবার!

সেনানী! চাই হুকুম!

সাত সমুদ্র তের নদী পারে মৃত্যু-বধূর ঘুম

টুটিয়াছে ওই যক্ষ-কারায় সহে নাক’ আর দেরি,

নকীব কণ্ঠে শনিব কখন অভিযান ভেরি!...

নাই তুমি নাই, তাই সয়ে যাব জমানার অভিশাপ,

তোমার তখতে বসিয়া করিছে শয়তান ইনসাফ!  
মোরা ‘আসহাব-কাহাফের’ মতো দিবানিশি দিই ঘুম,  
‘এশা’র আজান কেঁদে যায় শুধু-নিঃঝুম নিঃঝুম!

কত কথা মনে জাগে,  
চড়ি কল্পনা-বোররাকে যাই তেরশ’ বছর আগে  
যেদিন তোমার প্রথম উদয় রাঙা মরু-ভাস্কর,  
আরব যেদিন হল আরাস্তা, মরীচিকা সুন্দর।  
গোষ্ঠে বসিয়া বালক রাখাল মহম্মদ সেদিন  
বারে বারে কেন হয়েছে উতলা! কোথা বেহেশ্তী বীণ  
বাজিতেছে যেন! কে যেন আসিয়া দাঁড়িয়েছে তাঁর পিছে,  
বন্ধু বলিয়া গলা জড়াইয়া কে যেন সম্ভাষিছে!

মানসে ভাসিছে ছবি—

হয়তো সেদিন বাজাইয়া বেণু মোদের বালক নবী  
অকারণ সুখে নাচিয়া ফিরেছে মেঘ-চরণের মাঠে!  
খেলায়েছে খেলা বাজাইয়া বাঁশী মঞ্চার মরু বাটে!  
খাইয়াছে চুমু দুম্বা শিশুরে জড়াইয়া ধরি বুকে,  
উড়ায়ে দিয়েছে কবুতরগুলি আকাশে অজানা সুখে!  
সূর্য যেন গো দেখিয়াছে—তার পিছনে অমারাতি  
রৌশন-রাঙা করিছে কে যেন জ্বালায়ে চাঁদের বাতি।  
উঠেছিল রবি আমাদের নবী, সে মহা-সৌরলোকে,  
উমর, একাকী তুমি পেয়েছিলে সে আলো তোমার চোখে!  
কে বুঝিবে লীলা-রসিকের খেলা! বুঝি ইঙ্গিতে তার  
বেহেশ্ত-সাথী খেলিতে আসিলে ধারার পুনর্বীর।  
তোমার রাখাল-দোস্তের মেঘ চরিত সুদূর গোষ্ঠে,  
হেথা ‘আজনান’-ময়দানে তব পরাণ ব্যথিয়া ওঠে!  
কেন কার তরে এ প্রাণ-পোড়ানি নিজেই জান না বুঝি,  
তোমার মাঠের উটেরা হারায়, তুমি তা দেখ না খুঁজি!  
ইহারাই মাঝে বা হয়তো কখন দুঁহুঁ দৌঁহা দেখেছিল,  
খেজুর-মেতির গল-হার যেন বদল করিয়া নিল,  
হইলে বন্ধু মেঘ-চরণের ময়দানে নিরালায়,  
চকিত দেখায় চিনিল হৃদয় চির-চেনা আপনায়!

খেলার প্রভাত কাটিল কখন, ক্রমে বেলা বেড়ে চলে,  
প্রভাতের মালা শুকায়ে ঝরিল খর মরু বালুতলে।  
দীপ্ত জীবন মধ্যাহ্নের রৌদ্র তপ্ত পথে  
প্রভাতের সখা শত্রুর বেশে আসিল রক্ত-রথে।  
আরবে সেদিন ডাকিয়াছে বান, সেদিন ভুবন জুড়ি,  
'হেরা'-গুহা হতে ঠিকরিয়া ছুটে মহাজ্যোতি বিচ্ছুরি!  
প্রতীক্ষমাণ তাপসী ধরণী সেদিন শুদ্ধস্নাতা  
উদাত্ত স্বরে গাহিতেছিল গো কোরাণের সাম-গাথা!  
পাষাণের তলে ছিল এত জল, মরুভূমে এত ঢল?  
সপ্ত সাগর সাতশত হয়ে যেন করে টলমল!  
খোদার হাবিব এসেছে আজিকে হইয়া মানব-মিতা,  
পুণ্য-প্রভায় বলমল করে ধরা পাপ-শঙ্কিতা।  
সেদিন পাথারে উঠিল যে মৌজ তাহারে শাসন-হেতু  
নির্ভীক যুবা দাঁড়াইলে আসি ধরি বিদ্রোহ-কেতু!  
উদ্ধত রোষে তরবারি তব উর্দে আন্দোলিয়া  
বলিলে, “রাঙাবে এ তেগ মুসলমানের রক্ত দিয়া!”  
উন্মাদ বেগে চলিলে ছুটিয়া!—একী এ কী ওঠে গান?  
এ কোন লোকের অমৃত মন্ত্র? কার মহা আহ্বান?  
ফতেমা—তোমার সহোদরা—গাহে কোরান-অমিয়-গাথা,  
এ কোন মন্ত্রে চোখে আসে জল, হয় তুমি জান না তা!  
উন্মাদ-সম কেঁদে কও, “ওরে, শোনা পুনঃ সেই বাণী!  
কে শিখাল তোরে এ গান সে কোন বেহেশতে আনি  
এ কী হল মোর? অভিনব এই গীতি শুনি হয় কেন  
সকল অঙ্গ শিথিল হইয়া আসিছে আবেশে যেন!  
কী যেন পুলক কী যেন আবেগ কেঁপে উঠি বারে বারে,  
মানুষের দুঃখে এমন করিয়া কে কাঁদিছে কোন পারে?”

“আশহাদু আন-লা-ইলাহা ইল্লাল্লাহু” বলি  
কহিল ফাতেমা—“এই যে কোরান, খোদার কালাম গলি  
নেমেছে ভুবনে মহম্মদের অমর কণ্ঠে, ভাই!  
এই ইসলাম, আমরা ইহারই বন্যায় ভেসে যাই!”...  
উমর আনিল ইমান।—গরজি গরজি উঠিল স্বর

গগন পবন মছর করি—“আল্লাহ্ আকবর!”  
সম্রমে-নত বিশ্ব সেদিন গাহিল তোমার স্তব—  
“এসেছেন নবী, এত দিনে এল ধরায় মহামানব!”  
পয়গম্বর রবি ও রসুল—এঁরা তো খোদার দান!  
তুমি রাখিয়াছ, হে অতি-মানুষ, মানুষের সম্মান!  
কোরান এনেছে সত্যের বাণী, সত্যে দিয়াছে প্রাণ,  
তুমি রূপ-তব মাঝে সে সত্য হয়েছে অধিষ্ঠান।  
ইসলাম দিল কি দান বেদনা-পীড়িত এ ধরণীরে,  
কোন নব বাণী শুনাইতে খোদা পাঠাল শেষ নবীরে,—  
তোমারে হেরিয়া পেয়েছি জওয়াব সেসব জিজ্ঞাসার!  
কী যে ইসলাম, হয়তো বুঝিনি, এইটুকু বুঝি তার  
উমর সৃজিতে পারে যে ধর্ম, আছে তার প্রয়োজন!  
ওগো, মানুষের কল্যাণ লাগি তারই শুভ আগমন  
প্রতীক্ষায় এ দুঃখিনী ধরা জাগিয়াছে নিশিদিন  
জরা-জর্জর সন্তানে ধরি বক্ষে শান্তিহীন!

#### তপস্বিনীর মত

তাহারই আশায় সেধেছে ধরণী অশেষ দুখের ব্রত।  
ইসলাম—সে তো পরশ-মাণিক তারে কে পেয়েছে খুঁজি!  
পরশে তাহার সোনা হল যারা তাদেরই মোরা বুঝি।  
আজ বুঝি—কেন কেন বলিয়াছিলেন শেষ পয়গম্বর—  
“মোর পরে যদি নবী হত কেউ, হত সে এক উমর!”  
পাওনিকো ‘ওই’, হওনিকো নবী, তাইতো পরান ভরি’  
বন্ধু ডাকিয়া আপনার বলি বক্ষে জড়ায়ে ধরি!  
খোদারে আমরা করি গো সেজদা, রসূলে করি সালাম,  
ওঁরা উর্ধ্বের, পবিত্র হয়ে নিই তাঁহাদের নাম,  
তোমারে স্মরিতে ঠেকাই না কর ললাটে ও চোখে-মুখে  
প্রিয় হয়ে আছ তুমি হতমান মানুষ জাতির বুকো।  
করেছ শাসন অপরাধীদের তুমি করনিকো ক্ষমা,  
করেছ বিনাশ অসুন্দরের। বলনিকো মনোরমা।  
মিথ্যাময়ীরে। বাঁধনিকো বাসা মাটির উর্ধ্ব উঠি।  
তুমি খাইয়াছ দুঃখীর সাথে ভিক্ষার খুদ খুঁটি!

অর্ধ পৃথিবী করেছ শাসন ধুলার তখতে বসি  
খঁজুর পাতার প্রাসাদ তোমার বারে বারে গেছে খসি  
সাইমুম-ঝড়ে। পড়েছে কুটির, তুমি পড়নিকো নুয়ে,  
উর্ধ্বের যারা-পড়েছে তাহারা, তুমি ছিলে খাড়া ভুঁয়ে!  
শত প্রলোভন বিলাস বাসন ঐশ্বর্যের মদ  
করেছে সালাম দূর হতে সব, ছুঁইতে পারেনি পদ।  
সবারে উর্ধ্ব তুলিয়া ধরিয়া তুমিছিলে সব নিচে,  
বুকে করে সবে বেড়া করি পার, আপনি রহিলে পিছে!

হেরি পশ্চাতে চাহি—

তুমি চলিয়াছ রৌদ্রদগ্ধ দূর মরুপথ বাহি  
জেরুজালেমের কিন্না যথায় আছে অবরোধ করি  
বীর মুসলিম সেনা দল তব বহু দিন মাস ধরি।  
দুর্গের দ্বার খুলিবে তাহারা, বলেছে শত্রু শেষে—  
উমর যদি গো সন্ধিপত্রে স্বাক্ষর করে এসে।  
হায় রে আধেক ধরার মালিক আমিরুল-মুমেনিন  
শুনে সে খবর একাকী উষ্ট্রে চলেছে বিরামহীন  
সাহারা পারায়ে! ঝুলিতে দুখানা শুকনো ‘খবুজ’ রুটি,  
একটি মশকে একটুকু পানি খোঁর্মা দু-তিন মুঠি!  
প্রহরীবিহীন সম্রাট চলে একা পথে উটে চড়ি  
চলিছে একটি মাত্র ভৃত্য উষ্ট্রের রশি ধরি!  
মরুর সূর্য উর্ধ্ব আকাশে আগুন বৃষ্টি করে,  
সে আগুন-তাতে খই সম ফোটে বালুকা মরুর পরে।  
কিছুদূর যেতে উট হতে নামি কহিলে ভৃত্যে, “ভাই  
পেরেশান বড় হয়েছে চলিয়া! এইবার আমি যাই  
উষ্ট্রের রশি ধরিয়া অগ্রে, তুমি উঠে বসো উটে;  
তগু বালুতে চলি যে চরণে রক্ত উঠেছে ফুটে।”

...ভৃত্য দস্ত চুমি

কাঁদিয়া কহিল “উমর! কেমনে এ আদেশ করো তুমি?  
উষ্ট্রের পিঠে আরাম করিয়া গোলাম রহিবে বসি  
আর হেঁটে যাবে খলিফা উমর সে উটের রশি”

খলিফা হাসিয়া বলে,

“তুমি জিতে গিয়ে বড় হতে চাও, ভাই রে এমনই ছলে!  
রোজ-কিয়ামতে আল্লা যেদিন কহিবে “উমর! ওরে,  
করেনি খলিফা মুসলিম-জাঁহা তোর সুখ তরে তোরে!”  
কী দিব জওয়াব, কি করিয়া মুখ দেখাব রসূলে ভাই?  
আমি তোমাদের প্রতিনিধি শুধু! মোর অধিকার নাই  
আরাম সুখের,—মানুষ হইয়া নিতে মানুষের সেবা!  
ইসলাম বলে সকলে সমান, কে বড় ক্ষুদ্র কেবা!  
ভৃত্য চড়িল উটের পিঠে উমর ধরিল রশি,  
মানুষে স্বর্গে তুলিয়া ধরিয়া ধুলায় নামিল শশী  
জানি না, সেদিন আকাশে পুষ্পবৃষ্টি হইল কিনা,  
কী গান গাহিল মানুষে সেদিন বন্দি বিশ্ববাণী!  
জানি না, সেদিন ফেরেশতা তব করেছে কি না স্তব,—  
অনাগত কাল গিয়েছিল শুধু, “জয় জয় হে মানব!”...  
আসিলে প্যালেস্টাইন, পারায়ে দুস্তর মরুভূমি,  
ভৃত্য তখন উটের উপরে, রশি ধরে চল তুমি!  
জর্ডন নদী হও যবে পার, শত্রুরা কহে হাঁকি—  
“যার নামে কাঁপে অর্ধ পৃথিবী, এই সেই উমর নাকি?”  
খুলিল রুদ্ধ দুর্গা-দুয়ার! শত্রুরা সম্মুখে  
কহিল—“খলিফা আসেনি, এসেছে মানুষ জেরুজালেমে!”  
সন্ধিপত্র স্বাক্ষর করি শত্রু-গির্জা-ঘরে  
বলিলে, “বাহিরে যাইতে হইবে এইবার নামাজ তরে!”  
কহে পুরোহিত, “আমাদের এই আঙিনায় গির্জায়,  
পড়িলে নামাজ হবে না কবুল আল্লার দরগায়?”  
হাসিয়া বলিলেন, “তার তরে নয়, আমি যদি হেথা আজ  
নামাজ আদায় করি, তবে কাল অন্ধ লোক-সমাজ  
ভাবিবে—খলিফা করেছে ইশারা হেথায় নামাজ পড়ি  
আজ হতে যেন এই গির্জারে মোরা মসজিদ করি!  
ইসলামের এ নহেকো ধর্ম, নহে খোদার বিধান,  
কারও মন্দির গির্জারে করে মজিদ মুসলমান!”  
কেঁদে কহে যত ইসাই ইহুদি অশ্রু সিক্ত আঁখি—  
“এই যদি হয় ইসলাম—তবে কেহ রহিবেনা বাকি,  
সকলে আসিবে ফিরে

BANGLADARSHAN.COM

গণতন্ত্রের ন্যায় সাম্যের শুভ্র এ মন্দিরে!”  
তুমি নির্ভীক এ খোদা ছাড়া করনিকো কারে ভয়  
সত্যব্রত তোমায় তাইতে সবে উদ্ধত কয়।  
মানুষ হইয়া মানুষের পূজা মানুষরই অপমান  
তাই মহাবীর খালেদেরে তুমি পাঠাইলে ফরমান  
সিপাহ-সালেরে ইঙ্গিতে তব করিলে মামুলি সেনা,  
বিশ্ব-বিজয়ী বীরেরে শাসিত এতটুকু টলিলে না।  
ধরাধাম ছাড়ি শেষ নবী যবে করিল মহাপ্রয়াণ,  
কে হবে খালিফা-হয়নি তখনও কলহের অবসান,  
নব-নন্দনী বিবি ফাতেমার মহলে আসিয়া সবে  
করিতে লাগিল জটলা-ইহার পরে কে খালিফা হবে!  
বজ্রকণ্ঠে তুমিই সেদিন বলিতে বলিতে পারিয়াছিলে—  
“নবীসূতা! তবে মহল জ্বালাব, এ সভা ভেঙে না দিলে!”  
মানব-প্রেমিক! আজিকে তোমাকে স্মরি,  
মনে পড়ে যত মহত্ব-কথা-সেদিন সে বিভাবরী  
নগর-ভ্রমণে বাহিরিয়া তুমি দেখিতে পাইলে দূরে  
মায়েরে ঘিরিয়া ক্ষুধাতুর দুটি শিশু স্করণ সুরে  
কাঁদিতেছে আর দুঃখিনী মাতা ছেলেবে ভুলাতে, হয়,  
উনানে শূন্য হাঁড়ি চড়াইয়া কাঁদিয়া অকূলে চায়!  
শুনিয়া সকল-কাঁদিতে কাঁদিতে ছুটে গেলে মদিনাতে  
বয়তুল-মাল হইতে লইয়া ঘৃত আটা নিজ হাতে,  
বলিলে, “এসব চাপাইয়া দাও আর পিঠের পরে,  
আমি লয়ে যাব বহিয়া এ-সব দুখিনী মায়ের ঘরে।”  
কত লোক আসি আপনি চাহিল বহিতে তোমার বোঝা,  
বলিলে, “বন্ধু, আমার এ ভার আমিই বহিব সোজা!  
রোজ-কিয়ামতে কে বহিবে বলো আমার পাপের ভার?  
মম অপরাধে ক্ষুধায় শিশুরা কাঁদিয়াছে, আজই তার  
প্রায়শ্চিত্ত করিব আপনি!”—চলিলে নিশীথ রাতে  
পৃষ্ঠে বহিয়া খাদ্যের বোঝা দুখিনীর আঙিনাতে—  
এত যে কোমল প্রাণ,  
করণার বশে তবু গো ন্যায়ের করনিকো অপমান!  
মদ্যপানের অপরাধে প্রিয় পুত্রেরে নিজ করে

মেরেছ দোররা, মেরেছে পুত্র তোমার চোখের পরে।  
ক্ষমা চাহিয়াছে পুত্র, বলেছ পাষণে বক্ষ বাঁধি—  
“অপরাধ করে তোরই মত স্বরে কাঁদিয়াছে অপরাধী!”

আবু শাহমার গোরে

কাঁদিতে যাইয়া ফিরিয়া আসি গো তোমারে সালাম করে।  
খাস দরবার ভরিয়া গিয়াছে হাজার দেশের লোকে,  
‘কোথায় খলিফা’ কেবলই প্রশ্ন ভাসে উৎসুক চোখে,  
একটি মাত্র পিরান কাচিয়া শুকায়নি তাহা বলে  
রৌদ্রে ধরিয়া বসিয়া আছে গো খলিফা আঙিনা-তলে!  
...হে খলিফাতুল-মুসলেমিন! হে চীরধারী সম্রাট!  
অপমান তব করিব না আজ করিয়া নান্দী পাঠ,  
মানুষেরে তুমি বলেছ বন্ধু, বলিয়াছ ভাই, তাই  
তোমারে এমন চোখের পানিতে স্মরি গো সর্বদাই!  
বন্ধু গো, প্রিয়, এ হাত তোমারে সালাম করিতে গিয়া  
ওঠে না উর্ধ্বে, বক্ষে তোমারে ধরে শুধু জড়াইয়া!...

মাহিনা মোহররম—

হাসান হোসেন হয়েছে শহীদ, জানে শুধু হায় কৌম,  
শহীদি বাদশা! মোহররমে যে তুমিও গিয়াছ চলি  
খুনের দরিয়া সাঁতারি—এ জাতি গিয়াছে গো তাহা ভুলি!  
মোরা ভুলিয়াছি, তুমি তো ভোলনি! আজও আজানের মাঝে  
মুয়াজ্জিনের কণ্ঠে বন্ধু, তোমারই কাঁদন বাজে  
বন্ধু গো জানি, আমাদের প্রেমের আজও ও গোরের বুক  
তেমনি করিয়া কাঁদিছ হয়তো কত না গভীর দুখে!  
ফিরদৌস হতে ডাকিছে বৃথাই নবী পয়গম্বর,  
মাটির দুলাল মানুষের সাথে ঘুমাও মাটির পর!  
হে শহীদ! বীর! এই দোয়া কর আরশের পায়া ধরি—  
তোমারই মতন মরি যান হেসে খুনের সেহেরা পরি।  
মৃত্যুর হতে মরিতে চাহি না, মানুষের প্রিয় করে  
আঘাত খাইয়া যেন গো আমার শেষ নিঃশ্বাস পড়ে!

## এ মোর অহংকার

নাই বা পেলাম আরাম গলায় তোমার গলার হার,  
তোমায় আমি করব সৃজন,—এ মোর অহংকার!

এমনই চোখের দৃষ্টি দিয়া

তোমায় যারা দেখল প্রিয়া,

তাদের কাছে তুমি তুমিই। আমার স্বপনে  
তুমি নিখিল রূপের রাণী মানস-আসনে!—

সবাই যখন তোমায় ঘিরে করবে কলরব,  
আমি দূরে ধেয়ান-লোকে রচব তোমার স্তব।

রচব সুরধুনী-তীরে

আমার সুরের উর্বশীরে,

নিখিল কণ্ঠে তুলবে তুমি গানের কণ্ঠ-হার—  
কবির প্রিয়া অশ্রুমতি গভীর বেদনার!

যেদিন আমি থাকব নাক', থাকবে আমার গান,  
বলবে সবাই, “কে সে কবির কাঁদিয়েছিল প্রাণ?”

আকাশ-ভরা হাজার তারা

রইবে চেয়ে তন্দ্রাহারা,

সখার সাথে জাগবে রাতে, চাইবে আকাশে,  
আমার গানে পড়বে মনে আমায় আভাসে!

বুকের তলা করবে ব্যথা, বলবে কাঁদিয়া,  
“বন্ধু! সে কে তোমার গানের মানসী প্রিয়া?”

হাসবে সবাই, গাইবে গীতি,—

তুমি নয়ন-জলে তিতি

নতুন করে আমার গানে আমার কবিতায়  
গহীন নিরালাতে বসে খুঁজবে আপনায়!

রাখতে যেদিন নারবে ধরা তোমায় ধরিয়া,  
ওরা সবাই ভুলবে তোমায় দুদিন স্মরিয়া,

আমার গানের অশ্রুজলে

আমার বাণীর পদদলে

BANGLADARSHIAN.COM

দুলবে তুলি চিরন্তনী চির-নবীনা!  
রইবে শুধু বাণী, সেদিন রইবে নাক' বীণা!

তৃষ্ণা-‘ফোরাত’-কূলে কবে ‘সাকীনা’<sup>১</sup>-সমা  
এক লহমার হলে বধু, হয় মনোরমা!

মুহূর্ত সে কালের রেখা

আমার গানে রইল লেখা

চিরকালের তরে প্রিয়! মোর সে শুভক্ষণ  
মরণ-পারে দিল আমায় অনন্ত জীবন।

নাই বা পেলাম কণ্ঠে আমার তোমার কণ্ঠহার,  
তোমার আমি করব সৃজন এ মোর অহংকার!

এই তো আমার চোখের জলে,

আমার গানে সুরের ছলে,

কাব্যে আমার, আমার ভাষায়, আমার বেদনায়,  
নিত্যকালের প্রিয়া আমায় ডাকছ ইশারায়!...

চাই না তোমায় স্বর্গে নিতে, চাই না এ ধূলাতে  
তোমার পায়ে স্বর্গ এনে ভুবন ভুলাতে!

উর্ধ্বে তোমার-তুমি দেবী,

কি হবে মোর সে-রূপ সেবী!’

চাই না দেবীর দয়া, যাচি প্রিয়ার আঁখিজল,  
একটু দুঃখে অভিমানে নয়ন টলমল!

যেমন ক’রে খেলতে তুমি কিশোর বয়সে-  
মাটির মেয়ের দিতে বিয়ে মনের হরষে,

বালু দিয়ে গড়তে গেহ,

জাগত বুকু মাটির স্নেহ,

ছিল না তো স্বর্গ তখন সূর্য তারা চাঁদ,

তেমনি করে খেলবে আবার পাত্বে মায়া-ফাঁদ!

মাটির প্রদীপ জ্বালবে তুমি মাটির কুটিরে,  
খুশীর রঙে করবে সোনা ধূলি-মুঠিরে।

আধখানা চাঁদ আকাশ পরে

উঠবে যবে গরব-ভরে

তুমি বাকি আধখানা হাসবে ধরাতে,

তড়িৎ ছিঁড়ে পড়বে তোমার খোঁপায় জড়াতে!

BANGLADARSHIAN.COM

তুমি আমার বকুল যুথী-মাটির তারা-ফুল  
ঈদের প্রথম চাঁদ গো তোমার কানের পার্শ্বি দুলা!

কুসুমী-রাঙা শাড়ীখানি

চৈতী সাঁঝে পড়বে রাণী,

আকাশ-গাঙে জাগবে জোয়ার রঙের রাঙা বান,  
তোরণ-দ্বারে বাজবে করুণ বারোয়াঁ মুলতান।

আমার-রচা গানে তোমায় সেই বেলাশেষে

এমনই সুরে চাইবে কেহ পরদেশী এসে!

রঙিন সাঁঝে ওই আঙিনায়

চাইবে যারা, তাদের চাওয়ায়

আমার চাওয়া রইবে গোপন!-এ মোর অভিমান,  
যাচবে যারা তোমায়, রচি তাদের তরে গান!

নাই বা দিলে ধরা আমায় ধরার আঙিনায়,

তোমায় জিনে গেলাম সুরের স্বয়ংবর-সভায়!

তোমার রূপে আমার ভুবন

আলোয় আলোয় হল মগন,

কাজ কি জেনে কাহার আশায় গাঁথ্ছ ফুল-হার  
আমি তোমার গাঁথ্ছি মালা এ মোর অহংকার!

কৃষ্ণনগর

২৬ চৈত্র, ১৩৩৪

BANGLADARSHAN.COM

## খালেদ

খালেদ! খালেদ! শুনিতেছে নাকি সাহারার আহা-জারি?  
কত 'ওয়েসিস' রচিল তাহার মরু-নয়নের বারি।  
মরীচিকা তার সন্ধানী-আলো দিকে দিকে ফেরে খুঁজি'  
কোন নিরালায় ক্লান্ত সেনানী ডেরা গাড়িয়াছ বুঝি!  
বালু-বোররাকে সওয়ার হইয়া ডাক দিয়া ফেরে 'লু',  
তব তরে হয়! পথে রেখে যায় মৃগীরা মেশক-বু!

কর্জুর-বীথি আজিও ওড়ায় তোমার জয়ধ্বজা,  
তোমার আশায় বেদুইন-বালা আজিও রাখিছে রোজা।  
'মোতাকারিব'-এর ছন্দে উটের সারি দুলে দুলে চলে,  
দু-চোখ তাদের দিশাহারা পথে আলেয়ার মতো জ্বলে।  
'খালেদ! খালেদ!' পথ-মঞ্জিলে ক্লান্ত উটেরা কহে,  
"বণিকের বোঝা বহা তো মোদের চিরকালে পেশা নহে!"  
'সুতুর-বানের' বাঁশী শুনে উট উল্লাস-ভরে নাচে,  
ভাবে, নকীবের বাঁশরীর পিছে রণ-দামামাও আছে।  
ন্যুজ এ পিঠ খাড়া হত তার সওয়ারের নাড়া পেয়ে,  
তলওয়ার তীর গোর্জ নেজায় পিঠ যেত তার ছেয়ে।  
খুন দেখিয়াছে, তুণ বহিয়াছে, নুন বহেনিকো কভু!

বালু ফেড়ে ওঠে রক্ত-সূর্য ফজরের শেষে দেখি,  
দুশমান-খুনে লাল হয়ে ওঠে খালেদি আমামা এ কী!  
খালেদ! খালেদ! ভাঙিবে নাকি ও হাজার বছরি ঘুম?  
মাজার ধরিয়া ফরিয়াদ করে বিশ্বের মজলুম!-  
শহিদ হয়েছ? ওফাত হয়েছ? বুটবাত! আলবত!  
খালেদের জান কব্জ করিবে ওই মালেকুল-মৌত?  
বছর গিয়াছে গেছে শতাব্দী যুগযুগান্ত কত,  
জালিম পারসি রোমক রাজার জুলুম সে শত শত  
রাজ্য ও দেশ গেছে হারেখারে! দুর্বল নরনারী  
কোটি কোটি প্রাণ দিয়াছে নিত্য কতল-গাহেতে তারই!  
উৎপীড়িতের লোনা আঁসু-জলে গলে গেল কত কাবা,  
কত উজ তাতে ডুবে মলো হয়, কত নুহ হল তাবা!  
সেদিন তোমার মালেকুল-মৌত কোথায় আছিল বসি?  
কেন সে তখন জালিম রাজার প্রাসাদে প্রাসাদে পশি  
বেছে বেছে ওই 'সঙ্গ-দিল'দের কব্জ করেনি জান?  
মালেকুল-মৌত সেদিনও মেনেছে বাদশাহি ফরমান!-

মক্কার হাতে চাঁদ এল যবে তকদিরে আফতাব  
কুল-মখলুক দেখিতে লাগিল শুধু ইসলামি খাব,  
শুকনো খবুজ খোঁর্মা চিবায়ে উমর দারাজ-দিল  
ভাবিছে কেমন খুলিবে আরব দিন-দুনিয়ার খিল,-  
এমন সময় আসিল জোয়ান হাথেলিতে হাথিয়ার,  
খর্জুর-শিষে ঠেকিয়াছে গিয়া উঁচু উষ্ণীয় তার!  
কব্জা তাহার সব্জা হয়েছে তলওয়ার-মুঠ ডলে,  
দু-চোখ ঝালিয়া আশায় দজ্লা ফোরাত পড়িছে গলে!  
বাজুতে তাহার বাঁধা কোর-আন, বুকের দুর্মদ বেগ,  
আলবোরজের চূড়া গুঁড়া-করা দস্তে দারুণ তেগ।  
নেজার ফলক উল্কার সম উগ্রগতিতে ছোটে,  
তীর খেয়ে তার আশমান-মুখে তারা-রূপে ফেনা ওঠে।  
দারাজ দস্ত যেদিকে বাড়ায় সেইদিক পড়ে ভেঙে,  
ভাস্কর-সম যেদিকে তাকায় সেইদিক ওঠে রেঙে!  
গুলিদের বেটা খালেদ সে বীর যাহার নামের ত্রাসে  
পারস্য-রাজ নীল হয়ে উঠে চলে পড়ে সাকী-পাশে!  
রোম-সম্রাট শারাবের জাম-হাতে খরখর কাঁপে,  
ইস্তাম্বুলি বাদশার যত নজ্জুম আয়ু মাপে!  
মজলুম যত মোনাজাত করে কেঁদে কয় “এয়ু খোদা,  
খালেদের বাজু-শমশের রেখো সহি-সালামতে সদা।”  
আজরাইলও সে পারেনি এগুতে যে আজাজিলের আগে,  
ঝুঁটি ধরে তার এনেছে খালিদ, ভেড়ি ধরে যেন বাঘে!  
মালেকুল-মৌত করিবে কব্জ রুহ্ সেই খালেদের?—  
হাজার হাজার চামড়া বিছায়ে মাজারে ঘুমায় শের!  
খালেদ! খালেদ! ফজর হল যে, আজান দিতেছে কৌম,  
ওই শোন শোন—“আস্‌সালাতু খায়র মিনান্নৌম!”  
যত সে জালিম রাজা-বাদশার মাটিতে করেছে গুম  
তাহাদেরই সেই খাকেতে খালেদ করিয়া তয়ম্মুখ  
বাহিরিয়া এস, হে রণ-ইমাম, জামায়েত আজ ভারী!  
আরব, ইরাণ, তুর্ক, কাবুল দাঁড়ায়েছে সারি সারি!  
আব-জমজম উথলি উঠিছে তোমার ওজুর তরে,  
সারা ইসলাম বিনা ইমামেতে আজিকে নামাজ পড়ে!  
খালেদ! খালেদ! ফজরে এলে না, জোহর কাটানু কেঁদে,  
আসরে ক্লান্ত ঢুলিয়াছি শুধু বৃথা তহরিমা বেঁধে!  
এবে কাফনের খেলকা পরিয়া চলিয়াছি বেলা-শেষে,  
মগ্‌রেবের আজ নামাজ পড়িব আসিয়া তোমার দেশে!

BANGLADARSHAN.COM

খালেদ! খালেদ! সত্য বলিব, ঢাকিব না আজ কিছু,  
সফেদ দেও আজ বিশ্ববিজয়ী, আমরা হটেছি পিছু!  
তোমার ঘোড়ার খুরের দাপটে মরেছে যে পিপীলিকা,  
মোরা আজ দেখি জগৎ জুড়িয়া তাহাদেরই বিভীষিকা!  
হঠিতে হঠিতে আসিয়া পড়েছি আখেরি গোরস্থানে,  
মগরেব-বাদে এশার নামাজ পাব কিনা কে সে জানে!  
খালেদ! খালেদ! বিবস্ত্র মোরা পরেছি কাফন শেষে,  
হাথিয়ার-হারা, দাঁড়ায়েছি তাই তহরিমা বেঁধে এসে!  
ইমামতি তুমি করিবে না জানি, তুমি গাজী মহাবীর,  
দিন-দুনিয়ার শহীদ নোয়ায় তোমার কদমে শির!  
চারিটি জিনিস চিনেছিলে তুমি, জানিতে না হের-ফের,  
আল্লা, রসুল, ইসলাম আর শের-মারা শমশের!  
খিলাফত তুমি চাওনিকো কতু চাহিলে—আমরা জানি,—  
তোমার হাতের বে-দেরেগ তেগ অবহেলে দিত আনি!  
উমর যেদিন বিনা অজুহাতে পাঠাইল ফরমান,—  
“সিপাহ-সালার খালেদ পাবে না পূর্বের সম্মান,  
আমার আদেশ—খালেদ ওলিদ সেনাপতি থাকিবে না,  
সাদের অধীনে করিবে যুদ্ধ হয়ে সাধারণ সেনা!”  
ঝরা জলপাই-পাতার মতন কাঁপিতে কাঁপিতে সাদ,  
দিল ফরমান, নফসি নফসি জপে, গণে পরমাদ!  
খালেদ! খালেদ! তাজিমের সাথে ফরমান পড়ে চুমি  
সিপাহ-সালারের সকল জেওর খুলিয়া ফেলিলে তুমি।  
শিশুর মতন সরল হাসিতে বদন উজালা করি  
একে একে সব রেখে দিলে তুমি সাদের চরণ পরি!  
বলিলে, “আমি তো সেনাপতি হতে আসিনি, ইবনে সাদ,  
সত্যের তরে হইব শহীদ, এই জীবনের সাধ!  
উমরের নয়, এ যে খলিফার ফরমান, ছি ছি আমি  
লজিয়া তাহা রোজ-কিয়ামতে হব যশ-বদনামী?”  
মার মুখো যত সেনাদলে ডেকে ইঙ্গিতে বুঝাইলে,  
কুর্নিশ করি সাদেরে, মামুলি সেনাবাসে ডেরা নিলে!  
সেনাদের চোখে আঁসু ধরে না কো, হেসে কেঁদে তারা বলে,—  
“খালেদ আছিল মাথায় মোদের, এবার আসিল কোলে!”  
মক্কায় যবে আসিলে ফিরিয়া, উমর কাঁদিয়া ছুটে,  
এ কী রে, খলিফা কাহার বক্ষে কাঁদিয়া পড়িল লুটে!  
“খালেদ! খালেদ!” ডাকে আর কাঁদে উমর পাগল-প্রায়  
বলে, “সত্যই মহাবীর তুই, বুসা দিই তোকে, আয়!

BANGLADARSHAN.COM

তখতের পর তখত যখন তোমার তেগের আগে  
ভাঙিতে লাগিল, হাতুড়ি যেমন বাদামের খোসা ভাঙে,—  
ভাবিলাম বুঝি তোমারে এবার মুঞ্চ আরব-বাসী  
সেজদা করিবে, বীরপূজা বুঝি আসিল সর্বনাশী!  
পরীক্ষা আমি করেছি খালেদ, ক্ষমা চাই ভাই ফের,  
আজ হতে তুমি সিপাহ-সালার ইসলাম জগতের!”  
খালেদ! খালেদ! কীর্তি তোমার ভুলি নাই মোরা কিছু,  
তুমি নাই তাই ইসলাম আজ হটিতেছে শুধু পিছু।  
পুরানো দামামা পিটিয়া পিটিয়া ছিঁড়িয়ে গিয়াছে আজ,  
আমামা অস্ত্র ছিল নাকো তবু দামামা ঢাকিত লাজ!  
দামামা তো আজ ফাঁসিয়া গিয়াছে, লজ্জা কোথায় রাখি,  
নামাজ রোজার আড়ালেতে তাই ভীরুতা মোদের ঢাকি!  
খালেদ! খালেদ! লুকাব না কিছু, সত্য বলিব আজি,  
ত্যাগী ও শহীদ হওয়া ছাড়া মোরা আর সব হতে রাজি!  
রীশ-ই বুলন্দ, শেরওয়ানি, চোগা, তসবি ও টুপি ছাড়া  
পড়ে নাকো কিছু, মুসলিম-গাছ ধরে যত দাও নাড়া!

খালেদ! খালেদ! সবার অধম মোরা হিন্দুস্থানি,  
হিন্দু না মোরা মুসলিম তাহা নিজেরাই নাহি জানি!  
সকলে শেষে হামাণ্ডি দিই,—না, না, বসে বসে শুধু  
মুনাজাত করি, চোখের সুমুখে নিরাশা-সাহারা ধুধু!  
দাঁড়ায়ে নামাজ পড়িতে পারি না, কোমর গিয়াছে টুটি,  
সেজদা করিতে ‘বাবা গো’ বলিয়া ধূলিতলে পড়ি লুটি!  
পিছন ফিরিয়া দেখি লাল-মুখ আজরাইলের ভাই,  
আল্লা ভুলিয়া বলি, “প্রভু মোর তুমি ছাড়া নাই।”  
টক্কর খেতে খেতে শেষে এই আসিয়া পড়েছি হেথা,  
খালেদ! খালেদ! রি রি করে বুকে পরাধীনতার ব্যথা!  
বিশ্ব যখন এগিয়ে চলেছে আমরা তখনও বসে  
বিবি-তালাকের ফতোয়া খুঁজেছি ফেকা ও হাদিস চষে!  
হানফী, ওহাবী, লা-মজহাবীর তখনও মেটেনি গোল,  
এমন সময় আজাজিল এসে হাঁকিল, ‘তল্‌পি তোলা!’  
ভিতরের দিকে যত মরিয়াছি, বাহিরের দিকে তত  
গুনতিতে মোরা বাড়িয়া চলেছি গোরু ছাগলের মতো!  
খালেদ! খালেদ! এই পশুদের চামড়া দিয়ে কি তবে  
তোমার পায়ের দুশমন-মারা দুটো পয়জারও হবে?  
হায় হায় হায়, কাঁদে সাহারায় আজিও তেমনই ও কে?  
দজলা-ফোরাত নতুন করিয়া মাতম করিছে শোকে!

BANGLADARSTAN.COM

খর্জুর পেকে খোঁর্মা হইয়া শুকায়ে পড়েছে বুঝে  
আঙুর বেদানা নতুন করিয়া বেদনার রসে পুরে।  
এক রাশ শুকো আখরোট আর বাদাম ছাড়াতে লয়ে  
আঙুল ছেঁচিয়া মুখ দিয়া চুষে মৌনা আরবী-বউয়ে!  
জগতের সেরা আরবের তেজী যুদ্ধ-তাজির চালে  
বেদুইন-কবি সংগীত রচি নাচিতেছে তালে তালে!  
তেমনই করিয়া কাবার মিনারে চড়িয়া মুয়াজ্জিন  
আজানের সুরে বলে, কোনোমতে আজও বেঁচে আছে দ্বীন!  
খালেদ! খালেদ! দেখো দেখো ওই জমাতের পিছে কারা  
দাঁড়ায়ে রয়েছে, নড়িতে পারে না, আহা রে সর্বহারা!  
সকলের পিছে নহে বটে তবু জমাত-শামিল নয়,  
উহাদের চোখে হিন্দের মতো নাই বটে নিদ্-ভয়!  
পিরানের সব দামন ছিন্ন, কিন্তু সে সম্মুখে  
পেরেশান ওরা তবু দেখিতেছি ভাঙিয়া পড়েনি দুখে!  
তকদির বেয়ে খুন করে ওই উহারা মেসেরি বুঝি।  
টলে তবু চলে বারে বারে হারে বারে বারে ওরা যুঝি।  
এক হাতে বাঁধা হেম-জিঞ্জির আর এক হাত খোলা  
কী যেন হারামি নেশার আবেশে চক্ষু ওদের ঘোলা!  
ও বুঝি ইরাকি? খালেদ! খালেদ! আরে মজা দেখো, ওঠো,  
শ্বেত-শয়তান ধরিয়াকে আজ তোমার তেগের মুঠো!  
দুহাতে দুপায়ে আড়-বেড়ি দেওয়া ও কারা চলিতে নারে,  
চলিতে চাহিলে আপনার ভয়ে পিছন হইতে মারে।  
মরদের মতো চেহারা ওদের স্বাধীনের মতো বুলি,  
অলস দু-বাজু দু-চোখ সিয়াহ অবিশ্বাসের ঠুলি!  
শামবাসী ওরা সহিতে শেখেনি পরাধীনতার চাপ,  
তলওয়ার নাই, বহিছে কটিতে কেবল শূন্যে খাপ!  
খালেদ! খালেদ! মিসমার হল তোমার ইরাক শাম,  
জর্ডন নদে ডুবিয়াছে পাক জেরুজালেমের নাম!  
খালেদ! খালেদ! দুধারি তোমার কোথা সেই তলোয়ার?  
তুমি ঘুমায়েছ, তলোয়ার তব সে তো নহে ঘুমাবার!  
জং ধরেনিকো কখনও তাহাতে জঙ্গের খুনে নেয়ে,  
হাথেলিতে তব নাচিয়া ফিরেছে যেন বেদুইন মেয়ে!  
খাপে বিরামের অবসর তার মেলেনি জীবনে কভু,  
জুলফিকার সে দুখান হয়েছে, ও তেগ টুটেনি তবু।  
তুমি নাই তাই মরিয়া গিয়াছে তরবারিও কি তব?  
হাত গেছে বলে হাত-যশও গেল? গল্প এ অভিনব!

BANGLADARSHAN.COM

খালেদ! খালেদ! জিন্দা হয়েছে আবার হিন্দা বুড়ি,  
কত হামজারে মারে জাদুকরী, দেশে দেশে ফেরে উড়ি!  
ও কারা সহসা পর্বত ভেঙে তুহিন স্রোতের মতো,  
শত্রুর শিরে উন্মদবেগে পড়িতেছে অভিরত!  
আগুনের দাহে গলিছে তুহিন আবার জমিয়া উঠে,  
শির উহাদের ছুটে গেল হয়! তবু নাহি পড়ে টুটে!  
ওরা মরক্কো মরদের জাত মৃত্যু মুঠার পরে,  
শত্রুর হাতে শির দিয়া ওরা শুধু হাতে পায়ে লড়ে!  
খালেদ! খালেদ! সর্দার আর শির পায় যদি মূর  
খাসা জুতো তারা করিবে তৈরি খাল দিয়া শত্রুর!  
খালেদ! খালেদ! জাজিরাতুল সে আরবের পাক মাটি  
পলিদ হইল, খুলেছে এখানে যুরোপ পাপের ভাঁটি!  
মওতের দারু পিইলে ভাঙে না হাজার বছরি ঘুম?  
খালেদ! খালেদ! মাজার আঁকড়ি কাঁদিতেছে মজলুম।  
খোদার হাবিব বলিয়া গেছেন আসিবেন ইসা ফের,  
চাই না মেহেদি, তুমি এস বীর হাতে নিয়ে শমশের।

কৃষ্ণনগর

২১ অগ্রহায়ণ, ১৩৩৩

BANGLADARSHAN.COM

## খোশ আমদেদ

আসিলে কে গো অতিথি উড়ায়ে নিশান সোনালি।  
ও চরণ ছুঁই কেমন হাতে মোর মাখা যে কালি॥  
দখিনের হালকা হাওয়ায় আসলে ভেসে সুদূর বরাতি  
শবে-রাত আজ উজালা গো আঙিনায় জ্বলল দীপালি॥  
তালিবান বুমকি বাজায়, গায় মোবারক-বাদ কোয়েলা।  
উলসি উপচে পলো পলাশ অশোক ডালের ওই ডালি॥  
প্রাচীন ওই বটের ঝুরির দোলনাতে হয় দুলিছে শিশু।  
ভাঙা ওই দেউল-চূড়ে উঠল বুঝি নৌ-চাঁদের ফালি॥  
এল কি অলখ-আকাশ বেয়ে তরণ হরণ-আল-রশীদ।  
এল কি আল-বেরনি হাফিজ খৈয়াম কায়েস গাজ্জালি॥  
সানাইয়া ভয়রোঁ বাজায়, নিদ-মহলায় জাগল শাহজাদী।  
কারুণের রূপার পুরে নূপুর-পায়ে আসল রূপ-ওয়ালী।  
খুশীর এ বুলবুলিস্তানে মিলেছে ফরহাদ ও শিরী।  
লাল এ লায়লি লোকে মজনুঁ হরদম চলায় পেয়ালি॥  
বাসি ফুল কুড়িয়ে মালা না-ই গাঁথিলি, রে ফুল-মালি!  
নবীনের আসার পথে উজাড় করে দে ফুল ডালি॥

# জীবন

জাগরণের লাগল ছোঁয়াচ মাঠে মাঠে তেপান্তরে,  
এমন বাদল ব্যর্থ হবে তন্দ্রাকাতর কাহার ঘরে?  
তড়িৎ তুরা দেয় ইশারা, বজ্র হেঁকে যায় দরজায়,  
জাগে আকাশ, জাগে ধরা-ধরার মানুষ কে সে ঘুমায়?  
মাটির নীচে পায়ের তলায় সেদিন যারা ছিল মরি,  
শ্যামল তৃণাক্ষরে তারা উঠল বেঁচে নতুন করি;  
সবুজ ধরা দেখছে স্বপন আসবে কখন ফাগুন-হোলি,  
বজ্রাঘাতে ফুটল না যে, ফুটবে আনন্দে সে কলি!

BANGLADARSHAN.COM

# নওরোজ

রূপেরে সওদা কে করিবি তোরা আয় রে আয়,  
নওরোজের এই মেলায়!  
ডামাডোল আজি চাঁদের হাট  
লুট হল রূপ হল লোপাট!  
খুলে ফেলে লাজ শরম-টাট  
রূপসীরা সব রূপ বিলায়  
বিনি-কিম্মতে হাসি-ইঙ্গিতে হেলাফেলায়  
নওরোজের এই মেলায়!

শা'জাদা উজির নওয়াব-জাদারা-রূপকুমার  
এই মেলার খরিদ-দার!  
নও-জোয়ানীর জহুরী ঢের  
খুঁজিছে বিপণি জহরতের,  
জহরত নিতে-টেড়া আঁখের  
জহর কিনেছে নির্বিকার!  
বাহানা করিয়া ছোঁয় গো পিরান জাহানারার  
নওরোজের রূপকুমার!

ফিরি করে ফেরে শা'জাদি বিবি ও বেগম সাব  
চাঁদ-মুখের নাই নেকাব?  
শূন্য দোকানে পসারিনি  
কে জানে কী করে বিকি-কিনি!  
চুড়ি-কঙ্কণে রিনিঠিনি  
কাঁদিছে কোমল কড়ি রেখাব।  
অধরে অধরে দর-কষাকষি-নাই হিসাব!  
হেম-কপোল লাল গোলাব।

হেরেম-বাঁদিরা দেরেম ফেলিয়া মাগিছে দিল,  
নওরোজের নও-মফিল!  
সাহেব গোলাম, খুনি আশেক,  
বিবি বাঁদি,-সব আজিকে এক!  
চোখে চোখে পেশ দাখিলা চেক  
দিলে দিলে মিল এক সামিল।

BANGLADARSHAN.COM

বে-পরওয়া আজ বিলায় বাগিচা ফুল-তবিল!  
নওরোজের নও-মফিল!

ঠোটে ঠোটে আজ মিঠি শরবত ঢাল উপুর,  
রণ-ঝনায় পায় নূপুর।  
কিসমিস-ছেঁচা আজ অধর,  
আজিকে আলাপ 'মোখতসর!'  
কার পায়ে পড়ে কার চাদর,  
কাহারে জড়ায় কার কেয়ূর,  
প্রলাপ বকে গো কলাপ মেলিয়া মন-ময়ূর,  
আজ দিলের নাই সবুর।

আঁখির নিক্তি করিছে ওজন প্রেম দেদার  
ভার কাহারে অশ্রু-হার।  
চোখে চোখে আজ চেনাচেনি,  
বিনি মূলে আজ কেনাকেনি,  
নিকাশ করিয়া লেনাদেনি  
'ফাজিল কিছুতে কমে না আর!  
পানের বদলে মুন্না মাগিছে পান্না-হার!  
দিল সবার 'বে-কারার!

সাধ করে আজ বরবাদ করে দিল সবাই  
নিমখুন কেউ কেউ জবাই!  
লিকপিক করে ক্ষীণ কাঁকাল,  
পেশোয়াজ কাঁপে টালমাটাল,  
গুরু উরু-ভারে তনু নাকাল,  
টলমল আঁখি জল-বোঝাই!  
হাফিজ উমর শিরাজ পালায়ে লেখে 'ঝুঝাই!'  
নিমখুন কেউ কেউ জবাই!

শিরী লায়লিরে খোঁজ ফরহাদ খোঁজে কায়েস  
নওরোজের এই সে দেশ!  
চুড়ে ফেরে হেথা যুবা সেলিম  
নূরজাহানের দূর সাকীম,  
আরংজিব আজ হইয়া ঝিম  
হিয়ায় হিয়ায় চাহে আয়েস!

BANGLADARSHAN.COM

তখ্ত-তাউস কোহিনূর কারও নাই খায়েশ,  
নওরোজের এই সে দেশ!

গুলে-বকৌলি উর্বশীর এ চাঁদনি-চক  
চাও হেথায় রূপ নিছক।  
শারাব সাকী ও রঙে রূপে  
আতর লোবান ধুনা ধূপে  
সয়লাব সব যাক ডুবে,  
চাঁদ মুখে আঁকো কালো কলঙ্ক তিল-তিলক।  
চাও হেথায় রূপ নিছক!

হাসিস-নেশায় ঝিম মেরে আছে আজ সকল  
লাল পানির রংমহল।  
চাঁদ-বাজারে এ নওরোজের  
দোকান বসেছে মোমতাজের  
সওদা করিতে এসেছে ফের  
শাজাহান হেথা রূপ-পাগল।

হেরিতেছে কবি সুদূরের ছবি ভবিষ্যতের তাজমহল—  
নওরোজের স্বপ্ন-ফল!

# নকীব

নব-জীবনের নব-উত্থান-আজান ফুকারি এস নকীব।

জাগাও জড়! জাগাও জীব!

জাগে দুর্বল, জাগে ক্ষুধা-ক্ষীণ,

জাগিছে কৃষাণ ধুলায়-মলিন,

জাগে গৃহহীন, জাগে পরাধীন,

জাগে মজলুম বদ-নসিব!

মিনারে মিনারে বাজে আহ্বান—

‘আজ জীবনের নব উত্থান!’

শঙ্কাহরণ জাগিছে জোয়ান

জাগে বলহীন জাগিছে ক্লীব,

নব জীবনের নব উত্থান—

আজান ফুকারি এস নকীব!

ভূগলী

১৩ অগ্রহায়ণ, ১৩৩২

BANGLADARSHAN.COM

# বার্ষিক সওগাত

বন্ধু গো সাকী আনিয়াছ নাকি বরষের সওগাত—  
দীর্ঘ দিনের বিরহের পরে প্রিয়-মিলনের রাত।  
রঙিন রাখী, শিরীন শারাব, মুরলী, রবাব, বীণ,  
গুলিস্তানের বুলবুল পাখী, সোনালী রূপালী দিন।  
লালা-ফুল সম দাগ-খাওয়া দিল, নারগিস-ফুলি আঁখ,  
ইম্পাহানির হেনা-মাখা হাত, পাতলি কাঁখ!  
নৈশাপুরের গুলবদনীর চিবুক গালের টোল,  
রাঙা লেড়কির ভাঙা ভাঙা হাসি, শিরীন শিরীন বোল।  
সুরমা-কাজল স্তামুলি চোখ, বসোরা গুলের লালি,  
নব বোগাদাদি আলিফ-লায়লা, শাজাদি জুলফ-ওয়ালি।  
পাকা খর্জুর, ডাঁশা আঙ্গুর, টোকো-মিঠে কিসমিস,  
মরু-মঞ্জীর আর-জমজম, যবের ফিরোজা শিস।  
আশা-ভরা মুখ, তাজা তাজা বুক, নৌ-জোয়ানির গান,  
দুঃসাহসীর মরণ-সাধনা, জেহাদের অভিমান।  
আরবের প্রাণ, ফারেসের বাজু নৌ-তুর্কির,  
দারাজ দিলীর আফগানি দিল, মূরের জখমী শির।  
নীল দরিয়ার মেসেরের আঁসু, ইরাকের টুটা তখত,  
বন্দী শামের জিন্দান-খানা, হিন্দের বদবখত!—  
তাঞ্জাম-ভরা আঞ্জাম এ যে কিছুই রাখনি বাকি,  
পুরানো দিনের হাতে বাঁধিয়াছ নতুন দিনের রাখি।...  
চোখের পানির ঝালর-ঝুলানো হাসির খাঞ্চাপোশ  
—যেন অশ্রুর গড়খাই-ঘেরা দিলখোস ফেরদৌস—  
চাকিয়ো বন্ধু তব সওগাতি-রেকাবি তাহাই দিয়ে,  
দিবসের জ্বালা ভুলে যেতে চাই রাতের শিশির পিয়ে!  
বেদনার বানে সয়লাব সব, পাইনে সাথীর হাত,  
আনো গো বন্ধু নূহের কিশ্তি—‘বার্ষিকী সওগাত!’

# ভীরু

১

আমি জানি তুমি কেন চাহ নাকো ফিরে।  
গৃহকোণ ছাড়ি আসিয়াছি আজ দেবতার মন্দিরে।  
পুতুল লইয়া কাটিয়াছে বেলা  
আপনারে লয়ে শুধু হেলা-ফেলা,  
জানিতে না, আজ হৃদয়ের খেলা আকুল নয়ন-নীরে,  
এত বড় দায় নয়নে নয়নে নিমেষের চাওয়া কি রে?  
আমি জানি তুমি কেন চাহনাক ফিরে॥

২

আমি জানি তুমি কেন চাহনাক ফিরে।  
জানিতে না আঁখি আঁখিতে হারায় ডুবে যায় বাণী ধীরে।  
তুমি ছাড়া আর ছিলনাক কেহ  
ছিল না বাহির ছিল শুধু গেহ,  
কাজল ছিল গো জল ছিল না, ও উজল আঁখির তীরে।  
সেদিনও চলিতে ছিলনা বাজেনি ও-চরণ-মঞ্জীরে!  
আমি জানি তুমি কেন চাহ নাকো ফিরে॥

৩

আমি জানি তুমি কেন চাহনাক ফিরে।  
সেদিনও তোমার বনপথে যেতে পায়ে জড়াত না লতা।  
সেদিনও বেভুল তুলিয়াছ ফুল  
ফুল বিঁধিতে গো, বিঁধেনি আঙুল,  
মালার সাথে যে হৃদয়ও শুকায়, জানিতে না সে বারতা।  
জানিতে না, কাঁদে মুখর মুখের আড়ালে নিঃসঙ্গতা  
আমি জানি তুমি কেন কহ নাকো কথা॥

৪

আমি জানি তব কপটতা, চতুরালি!  
তুমি জানিতে না, ও কপোলে থাকে ডালিম দানার লালী!  
জানিতে না ভীরু রমণীর মন  
মধুকর-ভারে লতার মতন  
কেঁপে মরে কথা কণ্ঠে জড়ায়ে নিষেধ করে গো খালি।

আঁখি যত চায় তত লজ্জায় লজ্জা পাড়ে গো গালি!  
আমি জানি তব কপটতা, চতুরালি!

৫

আমি জানি ভীরু! কীসের এ বিস্ময়।  
জানিতে না কভু নিজেরে হেরিয়া নিজেরই করে যে ভয়।  
পুরুষ পুরুষ-শুনেছিলে নাম,  
দেখেছ পাথর করনি প্রণাম,  
প্রণাম করেছ লুরু দু'কর চেয়েছে চরণ ছেঁয়।  
জানিতে না, হিয়া পাথর পরশি' পরশ-পাথরও হয়!  
আমি জানি, ভীরু, কীসের এ বিস্ময়॥

৬

কীসের তোমার শঙ্কা এ, আমি জানি।  
পরানের ক্ষুধা দেহের দু-তীরে করিতেছে কানাকানি।  
বিকচ বুকের বকুল-গন্ধ  
পাপড়ি রাখিতে পারে না বন্ধ,  
যত আপনারে লুকাইতে চাও তত হয় জানাজানি।  
অপাঙ্গে আজ ভিড় করেছে গো লুকানো যতেক বাণী।  
কীসের তোমার শঙ্কা এ, আমি জানি॥

৭

আমি জানি, কেন বলিতে পার না খুলি।  
গোপনে তোমায় আবেদন তার জানায়েছে বুলবুলি।  
যে-কথা শুনিতেন মনে ছিল সাধ  
কেমনে সে পেল তারই সংবাদ?  
সেই কথা বঁধু তেমনই করিয়া বলিল নয়ন তুলি।  
কে জানিত এত জাদু-মাখা তার ও কঠিন অঙ্গুলি।  
আমি জানি কেন বলিতে পার না খুলি॥

৮

আমি জানি কেন যে নিরাভরণা,  
ব্যাথার পরশে হয়েছে তোমার সকল অঙ্গ সোনা।  
মাটির দেবীরে পরায় ভূষণ,  
সোনার সোনায় কীবা প্রয়োজন?  
দেহ-কূল ছাড়ি নেমেছে মনের অকূল নিরঞ্জনা।

বেদনা আজিকে রূপে তোমার করিতেছে বন্দনা।  
আমি জানি তুমি কেন যে নিরাভরণা॥

৯

আমি জানি, ওরা বুঝিতে পারে না তোরে।  
নিশীথে ঘুমালে কুমারী বালিকা, বধু জাগিয়াছে তোরে!  
ওরা সঁতারিয়া ফিরিতেছে ফেনা,  
শুন্তি যে ডোবে—বুঝিতে পারে না!  
মুক্তা ফলেছে—আঁখির ঝিনুক ডুবেছে আঁখির লোরে।  
বোঝা কত ভার হ'লে—হৃদয়ের ভরাডুবি হয়, ওরে,  
অভাগিনী নারী, বুঝাবি কেমন ক'রে॥

কৃষ্ণনগর  
৩২ শ্রাবণ, ১৩৩৪

BANGLADARSHAN.COM

# মিসেস এম. রহমান

মোহর্রমের চাঁদ ওঠার তো আজিও অনেক দেৱী,  
কেন কারবালা-মাতম্ উঠিল এখনই আমায় ঘেরি?  
ফোৱাতের মৌজ্ ফোঁপাইয়া ওঠে কেন গো আমার চোখে!  
নিখিল-এতিম ভিড় করে কাঁদে আমার মানস-লোকে!  
মর্সিয়া-খান! গাস নে অকালে মর্সিয়া শোকগীতি,  
সর্বহাৱার অশ্রু-প্লাবনে সয়লাব হবে ক্ষিতি!...

আজ হবে হায় আমি

কুফার পথে গো চলিতে চলিতে কারবালা-মাঝে থামি,  
হেরি চাৱিধারে ঘিৱিয়াছে মোরে মৃত্যু-এজিদ-সেনা,  
ভায়েৱা আমার দুশমন-খুনে মাখিতেছে হাতে হেনা,  
আমি শুধু হায় ৱোগ-শয্যায় বাজু কামড়ায়ে মরি!  
দানা-পানি নাই পাতার খিমায় নিৰ্জীব আছি পড়ি!  
এমন সময় এল ‘দুলদুল’ পৃষ্ঠে শূন্য জিন,  
শূন্যে কে যেন কাঁদিয়া উঠিল-‘জয়নাল আবেদিন!’  
শীর্ণ-পাঞ্জা দীর্ণ-পাঁজর পৰ্ণকুটির ছাড়ি  
উঠিতে পড়িতে ছুটিয়া আসিনু, রুধিল দুয়ার দ্বাৱী!  
বন্দিনী মার ডাক শুনি শুধু জীবন-ফোৱাত-পাৱে,  
“এজিদের বেড়া পাৱায়ে এসেছি, জাদু তুই ফিৱে যাৱে!”  
কাফেলা যখন কাঁদিয়া উঠিল তখন দুপুৱ নিশা!-  
এজিদে পাইব, কোথা পাই হায় আজৱাইলের দিশা!-  
জীবন ঘিৱিয়া ধু ধু করে আজ শুধু সাহাৱার বালি,  
অগ্নি-সিন্ধু কৱিতেছি পান দোজখ কৱিয়া খালি!  
আমি পুড়ি, সাথে বেদনাও পুড়ে, নয়নে শুকায় পানি,  
কলিজা চাপিয়া তড়পায় শুধু বুক-ভাঙা কাতৱাণী!  
মাতা ফাতেমার লাশের ওপৱ পড়িয়া কাতৱ স্বৱে  
হাসান হোসেন কেমন কৱিয়া কেঁদেছিল, মনে পড়ে!

অশ্রু-প্লাবনে হাবুডুবু খাই বেদনার উপকূলে,  
নিজের ক্ষতিই বড় কৱি তাই সকলের ক্ষতি ভূলে!  
ভূলে যাই-কত বিহগ-শিশুৱা এই স্নেহ-বট-ছায়ে  
আমারই মতন আশ্রয় লভি’ ভূলেছে আপন মায়ে।  
কত সে ক্লান্ত বেদনা-দন্ধ মুসাফিৱ এরই মূলে  
বসিয়া পেয়েছে মার তসল্লি, সব গ্লানি গেছে ভূলে!  
আজ তাৱা সবে কৱিছে মাতম্ আমার বাণীৱ মাঝে,

একের বেদনা নিখিলের হয়ে বুকে এত ভারী বাজে!  
আমারে ঘিরিয়া জমিছে অথই শত নয়নের জল,  
মধ্যে বেদনা-শতদল আমি করিতেছি টলমল!  
নিখিল-দরদী দিলের আন্মা! নাহি মোর অধিকার  
সকলের মাঝে সকলে ত্যজিয়া শুধু একা কাঁদিবার!  
আসিয়াছি মাগো জিয়ারত লাগি আজি অগ্রজ হয়ে  
মা-হারা আমার ব্যথাতুর ছোট ভাইবোনগুলি লয়ে।  
অশ্রুতে মোর অন্ধ দু-চোখ, তবু ওরা ভাবিয়াছে—  
হয়তো তোমার পথের দিশা মা জানা আছে মোর কাছে!  
জীবন-প্রভাতে দেউলিয়া হয়ে যারা ভাষাহীন গানে  
ভিড় করে মাগো চলেছিল সব গোরস্থানের পানে,  
পক্ষ মেলিয়া আবরিলে তুমি সকলে আকুল স্নেহে,  
যত ঘর-ছাড়া কোলাকুলি করে তব কোলে তব গেহে!  
'কত বড় তুমি' বলিলে, বলিতে, "আকাশ শূন্য বলে  
এত কোটি তারা চন্দ্র সূর্য গ্রহে ধরিয়াছে কোলে।  
শূন্য সে বুক তবু ভরেনি রে, আজও সেথা আছে ঠাঁই,  
শূন্য ভরিতে শূন্যতা ছাড়া দ্বিতীয় সে কিছু নাই!"  
গোর-পলাতক মোরা বুঝি নাই মাগো তুমি আগে থেকে  
গোরস্থানের দেনা শুধিয়াছ আপনারে বাঁধা রেখে!  
ভুলাইয়া রাখি গৃহহারাাদের দিয়া স্ব-গৃহের চাবি  
গোপনে মিটালে আমাদের ঋণ-মৃত্যুর মহাদাবী!  
সকলের তুমি সেবা ক'রে গেলে, নিলেনা কারুর সেবা,  
আলোক সবারে আলো দেয়, দেয় আলোকেরে আলো কেবা?  
আমাদেরও চেয়ে গোপন গভীর কাঁদে বাণী ব্যথাতুর,  
থেমে গেছে তার দুলালী মেয়ের জ্বালা-ক্রন্দন-সুর!  
কমল-কাননে থেমে গেছে বড় ঘূর্ণির ডামাডোল,  
কারার বক্ষে বাজে নাকো আর ভাঙন-ডঙ্কা-রোল!—  
বসিবে কখন জ্ঞানের তথ্তে বাংলার মুসলিম!  
বারে বারে টুটে কলম তোমার না লিখিতে শুধু 'মিম্'

সে ছিল আরব-বেদুইনদের পথ-ভুলে-আসা মেয়ে,  
কাঁদিয়া উঠিত হেরেমের উঁচা প্রাচীরের পানে চেয়ে!  
সকলের সাথে সকলের মত চাহিত সে আলো বায়ু,  
বন্ধন-বাঁধ ডিঙাতে না পেরে ডিঙাইয়া গেল আয়ু!  
সে বলিত, "ওই হেরেম-মহল নারীদের তরে নহে,  
নারী নহে যারা ভুলে বাঁধি-খানা ওই হেরেমের মোহে!  
নারীদের এই বাঁদি ক'রে রাখা অবিশ্বাসের মাঝে

লোভী পুরুষের পশু-প্রবৃত্তি হীন অপমান রাজে!  
আপনা ভুলিয়া বিশ্বপালিকা নিত্য-কালের নারী  
করিছে পুরুষ-জেলদারোগার কামনার তাঁবেদারী!  
বলে না কোরান, বলে না হাদিস, ইসলামী ইতিহাস,  
নারী নর-দাসী, বন্দিনী রবে হেরেমেতে বারোমাস!  
হাদিস কোরান ফেকা লয়ে যারা করিছে ব্যবসাদারী,  
মানে নাকো তারা কোরানের বাণী-সমান নর ও নারী!  
শাস্ত্র ছাঁকিয়া নিজেদের যত সুবিধা বাছাই করে  
নারীদের বেলা গুম হয়ে রয় গুমরাহ্ যত চোরে!”  
দিনের আলোকে ধরেছিলে এই মুনাফেকদের চুরি,  
মসজিদে বসে স্বার্থের তরে ইসলামে হানা চুরি!  
আমি জানি মা গো আলোকের লাগি’ তব এই অভিযান  
হেরেম-রক্ষী যত গোলামের কাঁপায়ে তুলিত প্রাণ!  
গোলাগুলি নাই, গালাগালি আছে, তাই দিয়ে তারা লড়ে,  
বোঝে নাকো থুথু উপরে ছুঁড়িলে আপনারই মুখে পড়ে!  
আমরা দেখেছি, যত গালি ওরা ছুঁড়িয়া মেরেছে গায়ে,  
ফুল হয়ে সব ফুটিয়া উঠিয়া ঝরিয়াছে তব পায়ে!  
কাঁটার কুঞ্জে ছিলে নাগমাতা সদা উদ্যত-ফণা  
আঘাত করিতে আসিয়া ‘আঘাত’ করিয়াছে বন্দনা!  
তোমার বিষের নীহারিকা-লোকে নিতি নব নব গ্রহ  
জন্ম লভিয়া নিষেধ-জগতে জাগায়েছে বিদ্রোহ!  
জহরের তেজ পান করে মাগো তব নাগ-শিশু যত  
নিয়ন্ত্রিতের শিরে গাড়িয়াছে ধ্বজা বিজয়োদ্ধত!  
মানেনি কো তারা শাসন-ত্রাসন বাধা-নিষেধের বেড়া-  
মানুষ থাকে না খোঁয়াড়ে বন্ধ, থাকে বটে গরু-ভেড়া!  
এসমে-আজম তাবিজের মতো আজও তব রুহ্ পাক্  
তাদেরে ঘেরিয়া আছে কি তেমনই বেদনায় নির্বাক্?  
অথবা ‘খাতুনে-জান্নাত’ মাতা ফাতেমার গুল্বাণে  
গোলাব-কাঁটায় রাঙা গুল্ হ’য়ে ফুটেছে রক্তরাগে?  
তোমার বেদনা-সাগরে জোয়ার জাগিল যাদের টানে,  
তারা কোথা আজ? সাগর শুকালে চাঁদ মরে কোনখানে?  
যাহাদের তরে অকালে, আশ্মা, জান দিলে কোরবান,  
তাদের জাগায় সার্থক হোক তোমার আত্মদান!  
মধ্যপথে মা তোমার প্রাণের নিবিল যে দীপ-শিখা,  
জ্বলুক নিখিল-নারী-সীমান্তে হয়ে তাই জয়টিকা!

BANGLADARSHAN.COM

বন্দিনীদের বেদনার মাঝে বাঁচিয়া আছ মা তুমি,  
চিরজীবী মেয়ে, তবু যাই ওই কবরের ধূলি চুমি!  
মৃত্যুর পানে চলিতে আছিলে জীবনের পথ দিয়া,  
জীবনের পানে চলিছ কি আজ মৃত্যুরে পারাইয়া?

কৃষ্ণনগর

১৫ পৌষ, ১৩৩৩

BANGLADARSHAN.COM

# ‘সুবহ্-উম্মেদ’ [পূর্বাশা]

সর্বনাশের পরে পৌষ মাস  
এল কি আবার ইসলামের?  
মম্বন্তর-অস্তে কে দিল  
ধরণীতে ধন-ধান্য ঢের?  
ভুখারীর রোজা রমজান পরে  
এল কি ঈদের নওরোজা?  
এল কি আরব-আহবে আবার  
মূর্ত মর্ত-মোর্তজা?  
হিজরত করে হজরত কি রে  
এল এ মেদিনী-মদিনা ফের?  
নতুন করিয়া হিজরি গণনা  
হবে কি আবার মুসলিমের?  
বরদ-বিজয়ী বদরুদ্দোজা  
ঘুচাল কি অমা রৌশনিতে?  
সিজাদ করিল নিজ্দ হেজাজ  
আবার ‘কাবা’র মসজিদে।  
আরবে করিল ‘দারুল-হার’—  
ধসে পড়ে বুঝি ‘কাবা’র ছাদ!  
‘দীন দীন’রবে শমশের-হাতে  
ছুটে শের-নর ‘ইবনে-সাদ!’  
মাজার ফাড়িয়া উঠিল হাজার  
জিন্দান-ভাঙা জিন্দা বীর!  
গারত হইল করদ হুসেন,  
উঁচু হল পুন শির নবীর!  
আরব আবার হল আরাস্তা,  
বান্দারা যত পড়ে দরুদ।  
পড়ে শুকরানা ‘আরবা রেকাত’  
আরফাতে যত স্বর্গ-দূত।  
ঘোষিল ওহদ, ‘আল্লা আহদ!’  
ফুকারে তূর্য তুর পাহাড়  
মন্দ্রে বিশ্ব-রক্ত-রক্তে  
মন্ত্র আল্লা-হ-আকরব!  
জাগিয়া শুনিবু প্রভাতী আজান

BANGLADARSHAN.COM

দিতেছে নবীন মোয়াজ্জিন।  
মনে হল এত ভক্ত বেলাল  
রক্ত এ-দিনে জাগাতে দীন!  
জেগেছে তখন তরণ তুরাণ  
গোর চিরে যেন আগোরায়।  
গ্রীসের গরুরী গারত করিয়া  
বোঁও বোঁও তলোয়ার ঘোরায়।  
রংরেজ যেন শমশের যত  
লালফেজ-শিরে তুর্কীদের।  
লালে-লাল করে কৃষ্ণসাগর  
রক্ত-প্রবাল চূর্ণী ফের।  
মোতি হার সম হাথিয়ার দোলে  
তরণ তুরাণী বুক পিঠে!  
খাটা-মেজাজ গাঁটা মারিছে  
দেশ-শত্রুর গিঠে গিঠে!  
মুক্ত চন্দ্র-লাঙ্কিত ধ্বজা  
পতপত ওড়ে তুর্কীতে,  
রঙিন আজি ম্লান আস্তানা  
সুর্খ রঙের সুর্খিতে  
বিরান মুলুক ইরাণও সহসা  
জাগিয়াছে দেখি ত্যজিয়া নিদ!  
মাশুকের বাহু ছাড়ায়ে আশিক  
কসম্ করিছে হবে শহীদ!  
লায়লির প্রেমে মজ্‌নুন আজি  
‘লা-এলা’র তরে ধরেছে তেগ।  
শিরীন শিরীরে ভুলে ফর্হাদ  
সারা ইসলাম পরে আশেক!  
পেশতা-আপেল-আনার-আধুর-  
নারঙ্গি-শেব-বোস্তানে  
মুল্‌তুবি আজ সাকী ও শরাব্  
দীওয়ান-ই-হাফিজ জুজদানে!  
নার্গিস লালা লালে-লাল আজি  
তাজা খুন মেখে বীর প্রাণের,  
ফিরদৌসীর রণ-দুন্দুভি  
শুনে পিঞ্জরে জেগেছে শের!  
হিংসায়-সিয়া শিয়াদের তাজে

BANGLADARSHAN.COM

শিরাজী-শোণিমা লেগেছে আজ।  
নৌ-রুস্তম উঠেছে রুখিয়া  
সফেদ দানবে দিয়াছে লাজ?  
মরা মরক্কো মরিয়া হইয়া  
মাতিয়াছে করি মরণ-পণ,  
স্তম্ভিত হয়ে হেরিছে বিশ্ব-  
আজও মুসলিম ভোলেনি রণ!  
জ্বালাবে আবার খেদিব-প্রদীপ  
গাজী আবদুল করিম বীর,  
দ্বিতীয় কামাল রীফ-সর্দার-  
স্পেন ভয়ে পায়ে নোয়ায় শির!  
রীফ শরিফ সে কতটুকু ঠাই  
আজ তারই কথা ভুবনময়!-  
মৃত্যুর মাঝে মৃত্যুঞ্জয়ে  
দেখেছে যাহারা, তাদেরই জয়!  
মেষ-সম যারা ছিল এতদিন  
শের হল আজ সেই মেসের!  
এ-মেঘের দেশ মেঘ-ই রহিল  
কাফির অধম এরা কাফের!  
নীল দরিয়ায় জেগেছে জোয়ার  
‘মুসা’র উষার টুটেছে ঘুম।  
অভিশাপ-‘আসা’ গর্জিয়া আসে  
গ্রাসিবে যন্ত্রী-জাদু-জুলুম।  
ফেরাউন আজও মরেনি ডুবিয়া?  
দেবী নাই তার, ডুববে কাল!  
জালিম-রাজার প্রাসাদে প্রাসাদে  
জ্বলেছে খোদার লাল মশাল!  
কাবুল লইল নতুন দীক্ষা  
কবুল করিল আপনা জান।  
পাহাড়ী তরুর শুকনো শাখায়  
গাহে বুলবুল খোশ এলহান!  
পামির ছাড়িয়া আমির আজিকে  
পথের ধুলায় খোঁজে মণি!  
মিলিয়াছে মরা মরু-সাগরে রে  
আব’হায়াতের প্রাণ-খনি!  
খর-রোদ-পোড়া খর্জুর তরু-

BANGLADARSHAN.COM

তারও বুক ফেটে ক্ষরিছে ক্ষীর!  
“সুজলা সুফলা শস্য-শ্যামলা”  
ভারতের বুকো নাই রুধির!  
জাগিল আরব ইরাণ তুরাণ  
মরক্কো আফগান মেসের।—  
সর্বনাশের পরে পৌষমাস  
লো কি আবার ইসলামের?  
  
কসাই-খানার সাত কোটি মেঘ  
ইহাদেরই শুধু নাই কি ত্রাণ  
মার খেয়ে খেয়ে মরিয়া হইয়া  
উঠিতে এদের নাই প্রাণ?  
জেগেছে আরব ইরাণ তুরাণ  
মরক্কো আফগান মেসের।  
এয় খোদা! এই জাগরণ-রোলে  
এ-মেঘের দেশও জাগাও ফের!

হুগলি  
অগ্রহায়ণ, ১৩৩১

BANGLADARSHAN.COM

॥সমাপ্ত॥